



明齋先生集

二

^ 16  
2376  
3

卷二十一





2376  
26-3

明齋先生遺稿卷之三

樂樓齋

詩

丁巳

酬羅仲輔

味子山遊作披吾病鬱襟風恬還止水石累忽高岑  
歷歷難停脚升升更用心莫教差路脉終恐落叢林

柳和仲 聖和 挽

哀哉柳和仲子命何其促古人亦有云氣清而數局  
美質實難見如君真可欲斷斷向學誠肫肫修行篤  
憶昔初負笈寒齋勤琢玉菜根匪不甘鹽齏亦不足  
去家二百里貧無馬與僕步往又步來不知為勞辱





三年築場悲與我共荼毒科名不須說志業方相勗  
一疾豈死人浮生奄風燭噫我先人門英才儘堪屬  
往往天中道吾黨天偏酷餘生抱父書閉戶蟄窮谷  
凜然懼荒墜望子來我督如今失良友我懷誰與告  
淒涼鵲泉墟舊遊難再續欲往盡一哀病冗苦纏束  
精靈想不昧蕭挽寄心曲

追次和叔韻

離騷值凜秋國風思在阿落葉滿山徑朋舊斷經過  
光陰漫把玩志氣已蹉跎命駕豈云難羸骨苦纏痾  
有疑欲誰辨有見無與劑時來撫孤松悵望仍嘯歌

陰陽有消長世變安足嗟獨此悠悠者其如千載何

俞生敬基挽二首

市老之孫直甫兒如何天逝使人悲冥冥獨向泉臺  
去母哭妻啼摠不知

眉目森然在眼中百年期望已成空荒原此日知何  
事不耐嗟嗟對病翁

俞胤甫遷葬挽

兄歸且十載我留頭已白逝者不復回永言懷曩昔  
德門禍猶慘賢咸天可惜至行竟無嗣天道堪咄嘖  
新阡懼不安孝子移真宅我病不得往悲恨空來積



近事不欲言吾道一何危外邊方鼎沸裏面仍瓦裂  
萬事盡謬悠斯文將殄脉天災又驚心世變難臆逆  
長卧復何憂餘生百無益修身以俟命禍福非避擇  
唯吾分內事古人我先獲令胤庶相勉此義期無斁  
最是廟享議遷延吾黨責盛德百世思何須較朝夕  
始謂疾可強操文哭靈席今焉莫之遂蕭挽寫我膈  
人事日以廢窮山伴木石兄應識此心幽明理無隔

再從弟天宇挽

每歎以君賢四十猶未達胡爲又無季奄忽令我怛  
善士亦豈福萬事已乖刺嗟君實好人襟抱常開豁

天然少嗜慾名利最踈脫視彼趨營徒奚翅十丈拔  
若令俛首來此學尋階闢潛心有八處豈難到快活  
惜乎止於斯誰哉司予奪可憐荒原上幽明此別闕  
欲賦挽歌詞悲懷不能掇

哭向陽成翁

文漢

昔來向陽里拜墓輒訪翁翁每倒屣迎迎我入堂中  
山果頗羅列慙慙示情衷開口散高談豁豁如發蒙  
聽罷却歎息舊家知遺風今來已不見一哭小齋空  
人事日以變愴懷安可窮出山重回首秋雨寒濛濛

柳白石遷葬挽



坡潭一脉到文元夫子平生早得門醇行在躬心慥  
慥教思容物德溫溫先人契在淵源共市老文傳侑  
享尊病螫末由觀緬禮敬將蕭挽向秋原

申生道和挽

可惜人才豈易生妙季詞翰已縱橫飛黃不顧蟾蜍  
怨松柏其如培塿傾身後詩書兒未晬人間琴瑟夢  
初驚丹旌忽向泉臺去一挽何能盡我情

滄江金丈又惠禁園黃一盆將以一律二絕謹

步韻以謝三首

不覺天時正剝陽朝來白屋見凝霜牢騷漫咏東籬

句蕪沒難尋老圃香多荷仙翁憐獨苦爲分瓊藥許  
同嘗開襟已似沉痾去掩戶要看滿意黃  
憐渠還媿養渠難每到秋深始問安顏面不殊前歲  
好任他凡卉盡摧殘

詩送寒花向我歸餘音瀨瀨影依依試看向晚茅簷  
下風若增清月益暉

又步前韻呈滄江案下三首

長江之上小山陽閑樂人間七十霜駐老豈誇千日  
酒滿園還喜四時香末流清濁何曾涉世味酸甘未  
足嘗蠻觸乾坤欹枕視倦來空復夢羲黃



一江秋月與山楓拋盡吟呻寂寞中歲暮天寒荒野  
闊至今身世似賓鴻

滄江一帶擅西湖江上諸山勝畫圖堪媿殘生轉迂

拙移家一計恐終孤 右二絕次其泛江韻

贈李一卿 相夔 二首

團圓一夜意難勝三十年間所未曾遙憶清源遠遊  
客窮廬愁坐對寒燈  
空山誰遣故人尋握手悲歡到夜淡燈下相看盡衰  
相可憐唯有少年心

俞直甫遷葬挽

昔日哭君兮兄及弟而偕亾今日哀君兮父與子而  
同藏昔季三十兮尚悲其歿今纔二九兮又何草草  
昔猶可慰兮有一塊之如存今焉已絕兮若冰解而  
無痕喟天地之已老兮羌理弱而氣強維善惡之所  
報兮或謬戾而反常跖躠之壽考兮顏冉短殤芝蘭  
之萎折兮鉤吻滋長噫君父子兮亦復奈何唯有後  
死兮出涕其沱瞻彼故山兮松柏依依骨肉是托兮  
魂魄有歸吾不知死者之有靈兮倘有哀而有樂繫  
父子之相逢兮有何言於冥漠咄余之抱羸兮與蟲  
俱蟄無由涉江兮一慟原隰追平生之師友兮但百



感之來集寄悲歌而為訣兮儻寒風而柴立

次李忠武舜臣韻

睢陽遺響遠諸葛大名高八哀思勁翮一割媿鉛刀  
張中丞睢陽城中有門開邊月近戰苦陣雲  
淡之句與將軍此作意思一般諸葛丞相謚  
忠武將軍勲業宜其同受大名也國家南北  
受敵讎恥未雪人之思將軍當愈久而不已  
如吾輩腐儒直鉛刀耳脫有緩急安有一割  
之用感慨之極情見于辭云

水國秋光暮驚寒鴈陣高憂心輾轉夜殘月照弓

刀

原韻

寄徐景翬鳳翎次其詠三賢韻

有美一處士乃在玄雄懸藏蹤罕出門十年未相見  
夏日忽來過稜稜舊顏面舌勁欲凌霜眼明能辨練  
淵源歎道孤黨禍悲世變開襟語未了一揖去如電  
書來更鄭重坐堅彌淡宴病蟄莫往從胷中冰炭戰

送別羅顯道

平生朋友間幾箇同臭味遇子輒開襟發言無忌諱  
學問在真心文章匪為貴况復義利間毫釐亦可畏  
儒道雜霸術黨論疑士氣舉世眩名實誰復分涇渭



斯文已塗地外面方鼎沸俛焉分內事曾傳在弘毅  
莫墜百季期幽懷庶相慰秋山正搖落白露凋百卉  
送別獨惆悵默默無與謂

寄守道從兄清源謫居

南天已降霜北地當下雪念我遠謫人中宵心欲折  
半生酒為跡邈與名利絕胡為白首季世禍手自撥  
諒以忠憤激非為他人悅死生且不顧致譽焉足說  
清源雖一隅先正有遺烈加飡願自愛盃勺宜先節  
經書少所讀靜裏好重閱昨夢侍親側與兄相提挈  
覺來悄無覩起坐淚垂血萬事儘關數一心未應滅

欲言豈盡意臨書又切切有俊寄一字庶以慰生別

送別李甥端明歸覲鐵甕謫所二首

歲暮仍多感分攜更惘然如今萬事裂終古幾人全  
誠立方言學人修可責天趨庭如問我窳谷雪盈顛  
杳杳歸西塞悽悽向北風心期嗟易老世變竟難窮  
但使中無忤何憂議未公惟應今日事加勉讀書功

次韻題李景略<sup>懽</sup>安分堂 戊午

隨處山間與水邊人生安分即超然一篇壁記還堪  
誦清儉傳家景昔賢

朴士受<sup>泰素</sup>挽



山中春晚好懷無幽計流傳又一吁不耐善人多短命可憐吾黨獨何辜清襟淡淡遺塵累古貌亭亭似澤癯悽愴如今那復見薤歌西望暮雲孤

仲舒 按 兄挽

早白非關短與脩誰言一卧優長休平生氣岸真男子晚歲菟裘舊鳳頭終古江湖餘水竹祇今談笑想風流悲吟漫負幽明別獨立空山萬樹秋

俞務安 命哲 挽

學字才名早榮親志願成青雲方展步白面已專城半夜藏舟失浮生夢枕驚蕭條餘破屋憔悴泣枯荆

忽忽幽明路陰陰草樹瑩祇今憐我病無計送君行

青林蕭寺諸生來會有懷亾姪為之流涕三首

歲暮幽懷付簡編且隨童冠掩山門他時儕友皆來集汝獨胡為在九原

眼中眉目尚森然清夜思渠淚似泉志業平生誰復識古來唯有怨蒼天

當時期望愛無窮萬事如今摠墮空掩卷幽吟和淚寫寫成那忍寄而翁

寄朴大叔 鐔 老范 鎮 昆弟四首

山門解攜時旬日以爲期我歸已一月子向何處之



遙望聖住山天際若雲垂欲往無羽翰悵然空相思  
賴子切磋力稍知復豎立我亦願吾子計較無太急  
道在日用間日學又時習積久始貫通初非從外襲  
晦翁見延平爲學就平實平實乃根基險薄終有失  
魯論一部書無非下學術下學乃上達躡易終無得  
利固不足說名亦非所慕多少狼狽人皆爲二字誤  
人能辨內外爲學始堅固千里起足下努力慎歧路  
己未仲春自青林移寓洪陽之龍頭村滄江金  
丈以二律作別謹步以謝  
好境其於病客何移家意味亦無多筋骸已瘁妨閑

步情興都消廢日哦夢入西峯花似錦春歸滄浦水  
如羅自憐底事來溪谷孤坐溪磯看小波  
休言痼疾在烟霞到處山厓可着家老去人生無舊  
况春來草色有新芽江湖漫興寧真樂身世羈棲未  
足嗟早晚鞦韆徑喚渡竹園花塢望非遐

宿俞起甫

命興

溪齋

雲水生涯儘不貧小齋清絕壓溪濱休言春晚多佳  
景月滿冰潭更爽人

酬起甫二首

歲換青林未定棲依依空復到龍溪蟄蹤乍動煩還



怕鄉井初離意自悽病覺工夫終鹵莽情慙朋友共  
提攜呻吟尚有經營計強起扶筇步水西

多君能自辨菟裘道是琴岡第一頭映帶澄湖宜翫  
月平臨大野好看秋生涯已向閑中得素業應從靜  
裏求兒輩漸長年漸晚願將鞭策戒優游

寄呈琴岡李尚書

尚真

台丈

琴岡一面枕溪隈杖履蕭然似草萊物外好將清福  
用人間盡閱險塗來獨慙病螫登門晚淡荷襟懷向  
我開細逕山中緣水下暖風晴日擬重陪

又次李尚書韻三首

琴溪名亦奇何必慕曾沂一室悠然處雙筇扶我歸  
萬事已皆裂幾人能得全南都看鐵壁今古仰忠賢  
退憂非是為吾身真樂難同古逸人解道洛波閑卧  
句也應雷雨起溪澗

右謹次高韻以申瞻仰之誠末句略有祝望  
之意則亦非為私也如何

又二首

八谷思因樹臨流想浴沂悠悠憂樂意千載與誰歸  
百感情懷百病身居然空作一窮人柴門客去無餘  
事漫玩潛魚俯石澗



右再次略抒微悰以答俯問悚仄

崔善餘

慶遠改字

來訪龍溪新寓韓汝尹

聖佑

亦來

聯枕

溪上相攜坐水邊客情溪水共悠然燈前更作春宵話此地團圓亦有緣

和徐子良

梓

二首

溪山也有過情聲一笑猶堪寄此生活計從前聊且爾茅齋近水喜初成  
嚶嚶春鳥有新聲溪谷相尋媿友生休把好言閑點撥初心頭白一無成

執中挽八絕

青林獨坐暮山中淨寺團圓歎未同望月歸來君已逝披衾執手痛何窮

朝逢暮見尚懸懸此別如何向九泉平日音容猶在目不堪陳迹已茫然

美中之粹敬中端季也清標似鵲鸞並出一家皆不永令人流涕惜才難

我家何罪禍何偏昆弟行中每拯賢門戶盛衰關運事浮生脩短欲誰憐

平生心事向君憑兄弟之情義友朋吾道日孤身日



病靜言空復淚霑膺

吾家拙法不求知榮辱窮通一任之全得此心無媿

作為君何必更嗟卑

孀女呼天弱子孤幽明遺恨想難除如今骨肉無他

望兒長如君愛讀書

庭前枯樹又花開一去人生不復迴今後定知無見

日游魂倘入夢中來

金生萬敵挽

春糧負笈遠相從猶賞前賢一脉風夢外忽傳消息  
惡不堪驚惋望山中

空留書冊祇傷心人事居然作古今回首青林舊遊  
處蕭歌為爾一悲吟

朴君謙挽

厚福人間孰與公子孫盈膝壽遐終園林最占東岡  
勝符彩偏稱長者風不耐一鄉耆宿盡堪嗟往事逝  
波空祇今孤露餘衰骨蕭挽悲吟雪谷中

謹用滄江金丈韻呈五老亭案下

勝處當留百世名同時五老落新成咸翁素節窮逾  
苦江叟高風晚更清已賀墳簾怡暮景方看蘭玉振  
家聲平生不識琴碁興漫托文章效下情

記文太繁  
敢撮其意



如此若使兒輩諷詠而聽之恐當不減於絲竹也伏乞一笑

庚申元日偶閱舊篋得昔年與可教酬和韻不覺流涕遂步其韻寄教官

歲月周還復人生去不歸懸知己為土時復浪沾衣  
不恨身名天長悲志業違吟成欲相寄淚迸恐難揮  
見舍弟書有感吟寄兼示國材

長夏茅簷下誰爭二士閑有風來枕上無客到松間  
已分躬耕野何須遠入山嗟吾如倦鳥歲暮欲飛還

代書謝金結城用晦

時輝

石上小草亭風光擅一壑蒼然主人翁世味蟬翼薄

釀成荷葉酒相招慰寂寞病客少清興百事懶振作  
坐想細雨中獨對荷花酌會待新月明攜筇踐前諾

酬韓汝尹用前韻為七言

君亦胡為在丘壑偃蹇平生霜鬢薄欣然更有好客  
顏却笑他人厭寂寞有時高韻吐幽懷一諷能令病  
夫作光風會與霽月俱白酒且待黃花酌共把參同  
保歲寒我欲有言君肯諾

對案坐睡夢亾姪

魂從何處忽相隨白面青衫宛昔時耳目日衰吾老  
矣覺來無語淚雙垂

古有老釋憂其道之無託而泣此情人知之亦歎矣



寄朴大叔老范三首

溪邊送客掩門遲能記前秋惜別時老去益思親勝已  
已懂懂來往豈云私

工夫毋疾亦毋遲積久方看得力時天理當然吾去做  
做避名求利摠成私

歲月如流未解遲着功須趁少年時居然頭白嗟無及  
及感子誠心告我私

中篇自知僭汰而直以情義之淡不敢自外不可以掛他眼也千萬心諒

次李尚書台丈長韻以述鄙懷

萬事由來在化翁盈虛消息莽無窮分明運氣皆前定  
定多少人情枉作恩世道且休論蜀洛端由先合究  
和同學要真實心方正人克偏私理自公本質竟誰  
移砥玉平時漫說辨蘭蓬長悲 聖志終埋沒不信  
天心有感通兀兀一身虛向老悠悠百感但盈中師  
資義在慙終始臣子誠微負孝忠屏伏自期甘沒齒  
沉吟不覺遽披衷猶聞海內方多故更把前頭問太  
空

寄崔善餘

三冬窮谷喜聞覓十日元春尚掩窓閱歲光陰融過



二資身計策信無雙陶翁只向瓶中見韓子唯將筆  
力扛同病故人相問訊擁衾孤詠對寒缸

宗會于淨寺

青山祇如昨白髮已盈頭舊業悲全墜頽齡惜易邁  
有誰能嗣事當日好貽謀此會如無替斯文庶共修

示兒輩二首

微幸科場是利心利心萌動後難禁格言好向兒曹  
說須信偷牛始竊鍼  
秋霖收盡覺涼生佔畢如今可趁程萬事儘從勤苦  
得呼僮急去斲松明

奉次滄江金文詠梅見示韻

使從滄江來幽憂忽破綻瓊瑤入我手光彩驚人眼  
居然得三復念之如一串如聞清香遠似對蒼顏莞  
心期幸見許蘭室事曾慣身世寄棲遁窮通等夢幻  
開逕集羣芳俗物誰能間敷華惱韶光抗節供歲晏  
四時迭相承奇翫亦無限別有一盆花不數萬金產  
鄰律未須溫春容座中辨塵埃不敢到雪霜非所患  
咲彼夸毗子世路劇危棧名實混周朴大小迷鵬鷁  
畢竟自呈露紛紜競真贗方憂塞咎責何暇辭嗤媿  
嗟余事屏蟄本業唯編簡行藏任萍梗飲啖希木澗



永言附下風天遊得竊矚白雲祇自悅玄經何足換  
從今益有悟既往知不諫會待好風日杖屨隨童艸  
病骨尚能強佳期庶不慢逸韻覺襟爽清誨忘朝盱  
青梅正堪摘就樽當洗盞

次志卿韻二首

美質人多負初心子勿欺只憂修業惰無患立名遲  
老悔嗟何補季光劇似馳青陽又逼歲白雪滿庭枝  
坐見三餘盡空爲二豎欺自慙吾學退未訝友來遲  
志道要誠立存心忌外馳徒然延佇處歸鳥集寒枝

代書寄韓汝尹

辛酉

小窓面陰崖不知春已晚偶然一出門花光照山苑  
梅嶽叩理隱荷塘繞菊畹豈無樂志事柰此憂世悃  
龍村最寥寂素履自安穩璿機寓幽討玉延代晚飯  
別有讀書室諸賢方袞袞詞章謝華藻學業務基本  
嗟余久離索幸此共棲遁隨處得披襟向夕還忘返  
眷言金井客閑情同偃蹇三旬阻攜手室邇人似遠  
夜來微雨零物色更清婉長吟伐木篇拈筆寄繾綣

題李子貞篋二律

爲子曾題八疊屏更裝新篋意彌誠一言若得平生  
用外物非關四十名莫向紅塵尋路徑須從黃卷保



交情吟成七八慙慙字朝夕無妨作座銘  
離合悠悠歎古今今時誰復似君心羞從鬧處看追  
逐喜向閑中聽戒箴農隱窩邊消永日寒泉亭下滌  
煩襟依依我亦歸窮谷歲暮心期重盍簪

柳察訪懋懋哉丈挽

禮樂周旋四十秋艮林門下孰公儔平生素業貧猶  
樂晚歲微官我不求每念先君偏愛重空悲餘喘阻  
從遊如今忽作幽明隔蕭挽歌成淚自流

金結城時輝挽

白蓮池畔小亭空終古浮生似燭風病裏遺言真達

士閑時自號一愚翁才能世棄身雖屈經業家傳後  
必通聞道高岡臨絕壑千秋好卧暮雲中

酬李生世德

一別從春僂至冬思君令我意憧憧中心若要存吾  
敬外面先應正爾容俗學患無高眼目吾人須有大  
心曾願言勿失朱門訣窮谷他時起病慵

梅邊成表叔樓挽

舊業坡山自聽松再世傳我滄浪翁滄浪懿德世莫  
知樂道無悶甘長終都將餘慶付後人梅邊壽祿天  
所鍾居家克篤孝謹行在官不墜儒素風晚歲優游



洛社會五老勝事傳諸公居然逾八又逾九四體康  
寧明且聰 明廷 見老人星九命章服加崇崇步  
入 天門拜喜聖恩當時滿城驚兒童膝下孫曾九  
十餘一門和氣春融融瞻聆感慕競咨嗟福善之理  
知無窮方期遐筭過一百使我東方爲壽域一朝遽  
捐專城養聞道衣冠就窳窳小子永抱鮮民痛每羨  
諸兄舞彩服往年一候書室中未覺溪山異今昔爲  
我手書八大字古筆蒼然似顏色邇來病螫人事絕  
只恨移家未易得萬事如今欲安仰逝水人間已陳  
迹獨把蕭章訴哀懷明發悲吟淚交滴吾先墓在月  
籠下雨露濡時倍怵惕今季倘遂歸掃計鹿門新阡  
拜秋夕

朴參奉

承後 挽

十室有忠信一命能濟人聖賢豈我欺於公驗斯言  
隆師曾築場憂國屢抗章平生古貌心俗兒任相輕  
七十厭塵世黃壚返真宅病螫人事絕蕭挽替一哭  
欲說幽潛德慙吾筆無力

次子敬酬李彝仲韻還寄凝香閣二首

閑忙都在我動靜豈由居有欲恆無足無爲自有餘  
唯當更奮志好取舊看書名位應前進才誠勉養儲



草初如新接依稀是舊居松聲風過後草色雨來餘  
漫道魚生鼎堪啣肉怕書雙包看馬運絕勝見瓶儲

予敬時有周急之惠故云

次金淮陽延之 壽增 籠水亭韻二首

茅亭一撮着巖巒傑句聯翩滿世間從古高蹤藏不  
得未應流水解籠山

是非元不到林巒一室蕭然遠世間料得三公難換  
了令人矯首望雲山 延之送版采題

具生 廌 挽

哀哉具秀才作人頗不俗言語叟多真襟懷如寡欲

妙季却慕學負笈來窮谷攜來竹牖卷餘韻謂可續  
如何困二豎奄作風中燭一書告我訣惻愴不忍讀  
病蟄人事絕幽明負相哭精靈倘有知蕭挽淚一掬

貸米僧舍不得戲題

隣僧乞米玉川子舉家食粥顏魯公乞米也難粥也  
乏謾謾唯聞松下風

李參奉 柱吉 挽

壬戌

憶昨遷龍溪焉依二三子夫君始識面久要還相似  
因之見所存淵然有遠致持心既不苟好善儘誠意  
聚散覺有數分張悵造次勤來訪窮谷益媿情與義



日齋遺稿 卷三  
孰謂強仕初奄忽而至此平生抱器識可惜空入地  
輦輦在堂親踽踽同巷士豈無哭殯計淡慙病未遂  
幽明一幅挽送訣寄蒿里窮達不須論天壽亦命耳  
有兒足慰人浮生叟何冀唯將終孝事泣涕勉賢嗣

李沃溝

廷璘挽

昨行過京城聞君遽長逝幽明負一哭噫余人事廢  
識面雖云晚交情已累世前年病吟中載酒忽臨睨  
握手露天眞征驂半日憇山泉有故事風義喜未替  
孤露髮俱白相看叟感涕解符來隣鄉經冬得濡滯  
參尋空有意病慵終不逮孰謂古今別居然在此歲

浮生儘奄忽早晚皆次第周甲尚稱壽晚景猶折桂  
况有二難并朋流欽學藝尤憐勤讀兒妙齡能獨詣  
幸哉此爲福萬事那足計去去返眞宅青山正迢遞  
難將一杯餞叟叙平生契佇立遡悲風蕭歌望雲際

酬李肯四絕

麋性近城增怵惕鸞姿在野叟光輝未成水石參眞  
去還得瓊琚滿袖歸

我取終南爲捷徑君從平地作蓬萊無論札翰嫌煩  
省未必襟懷對面開

古規或出常情外今士誰超世指中已辦自家安子



履尚迷歧路困吾蒙  
人各有情憂不察道存隨處怕難明浮華固合都刊  
落本實尤須更講評

南宮僉正 稿 表叔挽

向來中表尊行中獨有公與梅邊翁梅翁壽祿世所  
稀 累朝恩典皆身蒙梅翁逝後公無恙謂言當繼  
梅翁享八旬未滿遽觀化一門後生將安仰平生厚  
德誰得似清謹一節尤無比先人兄弟最相愛友于  
之情同胞視憶昔經過到衡門欣然相對窮朝曠音  
容未昧迹已陳萬事如今唯淚痕螿蹤棲棲歸意急

臨穴一哀何由及蕭章草草寫悲懷寄向青山久佇  
立

壬戌重陽

白日如梭擲佳辰似鴈歸孤筇鳴石逕晚露墜人衣  
筋力衰逾甚心期漸已違悽然死生別忽復淚雙揮  
歲丙辰秋與舍弟及國材及亾姪同登後峯  
分坐石角酌酒啗果頗有幽興今姪亾已六  
載而兩君各從宦出去悵然有陳迹之感偶  
記昔日與亾姪酬和韻仍次之以寄舍弟懷

川縣齋



次舍弟見寄韻

既已爲官去何能似卧廬猶應有濟物不必每懷居  
處事尤須慎操心更莫踈一朝如不樂優可命中車

題南子聞遊南海之錦山記後

憂患有時有名區無處無南遊已可詫子和不爲孤  
老法仍精健妍情更鬱紆琅琅八十字留作海邊珠  
子聞投余以是記蓋山在南海島中卽其尊  
君謫居時所陪遊者也揆幽選勝閑適之趣  
可掬而思親戀君之感往往發於言外至  
於竄斥困蹙憂愁怵迫之意則曠然欲尋而

不可得其父子之所養可知矣昨余叩子聞  
以比來所得而子聞示余以此余始頗訝其  
所應非所求既一覽而後方知其學力之所  
至如此卷末有錦山詩一律其尊君所賦而  
子聞之奉次者也謹步其韻題其後以歸之  
又足以一絕

左氏愛稱君子曰訟端非獨禮家名世間毀譽苦浮  
實安得人心衡似平

余於是記愛其敘致贈雅爲之三復焉第其  
所取譬者雖有觀物察理之意亦太涉宛轉



殊乏自然之味頗與左傳中所引君子之言者相類昔拯遊關東取八景者為之取捨而長短之市南先生見笑以為徒起爭端今此評品諸山者雖各極其趣而亦不無是病悔翁所謂不獨會禮為聚訟者恐亦不止於蘭亭敘也且是山雖奇計不過海中一拳石耳顧以子聞筆力之妙使之壓倒諸名山東坡所稱物情不當然者非謂此類耶仍略舉似以復焉未知子聞以為如何

崔主一 基萬 挽三首

名賢之後善人家孝子仍蒙 寵典加君又平生惇

行義如何無命使人嗟 主一崔烟村德之從而一

以孝行 蒙褒贈

炭坊當日教人誠一字終身儘可行終始師門情獨至此心非為利兼名

盡心喪祭世猶稀靜守幽貞又庶幾文未成名皆為惜不知無辱是全歸

姜掌令 時徽 挽

南中文彩數公門公在門中福最敦三品為官名既顯七旬躋壽德仍尊休休晚擅鄉園勝秩秩終看子



姓蕃唯是一季凋謝遽病吟哀挽自傷魂君與族繼

去逝

次閱彥暉以升卜居韻還寄二首

此道方如線人心易受塵知君精進勇使我感歎頻  
志氣都由我知行豈係人遙知靜養地生意藹如春  
歲暮相思苦書來拂案塵病慵吾不振提警子能頻  
可幸衰頰日方資琢磨人明年如命駕徑訪草堂春  
朴參知仲固世望挽

卧閱光陰已十春如何觀化歟今辰高才少日誰爭  
的末路平生獨任真再世託姻悲命短一家投分得

心親顧慙病螫無人事哀挽題封感淚新

楊慈仁震行挽

溪邊卜築極蕭然晚景閑居二十年科第少時皆稱  
意宦途當日竟誰憐先人同榜情仍厚令子從遊義  
更偏幽螫暮春猶未動一哀慙負會新阡

次韻謝羅仲輔 癸亥

道理何嘗一槩然高卑大小莫非天當時不可無諸  
葛其次猶稱有仲連賤分尚難希一節虛名安得效  
真賢休言計較為私意凡事終須在定前

次韻謝李景略



非無交象有茅征君子由來恥過情盛際敢云時未  
可冥行自恐見難明近城添罪知吾妄訪旅隨書感  
子誠祇是 聖恩無路答撫躬空悼鮮民生

金上庠 吳成 挽

無羨當時樂志篇倚山風榭小溪邊立揚共說文科  
貴勤謹尤憐少子賢誰得似君全此福亦難於世過  
稀季蕭章一曲遙相送病裏幽懷獨愴然

次徐景輦韻

吾家主人翁本號為靈通中藏生物理發出愛而公  
聖聖此相傳何季來我東圃忠接箕條昭代道彌隆

靜庵少達施喚起大有功退陶規模成真實無脫空  
坡潭並一世大明如日中出處古合符理氣今發蒙

出處言牛溪  
理氣言栗谷

嗟哉我賢人莫歎重隱窮傳扶一綫脉

德業儘廣崇且講

一作方知

誠正學休論

一作可免

偏黨風庭

聞只如此願與同志同

偏黨二字已見於箕範其來尚矣有得於誠  
正之學則自無此弊此實直下相傳之心法  
也景輦述不立黨師友淵源說以示余余為  
推先君子平日之論以題其後故篇未及之

柳直講 偉 挽



行業勤修己家聲早著鄉騰騫已云暮逝去更何忙  
谷口承頻訪江頭荷遠將歸輻負一哭衰涕灑哀章

寄崔善餘

崢嶸冰雪凍雲陰送客關門獨病吟追逐一場非惡  
事可憐空有少年心

寄謝青蘿吟案仍請所詠盆梅

瓊詞一諷一回新拍拍清香滿袖春安得移來置座  
右對花如對似花人

以一絕仰敵三疊非敢簡也蓋有待也梅至  
則當傾困以償也

寄別羅顯道赴平康縣

甲子

久矣辭榮計居然奉檄行憂時寧遠迹愛日且專城  
體立那無用才優更貴誠離愁當暮歲窮谷獨馳情  
壽孫亾日卧聞其母哭聲

兒兮去何處母兮哭何為森然可憐容應已化黃埃  
嗟吾門祚薄得汝還失之縱令復生子那得如馨兒  
置之勿復思思來但傷悲

金土方架挽

柴門幾度繫羸驂每見高齋午夢酣好卜林泉專勝  
境都將榮辱付閑談重婚一歲魂俱逝世德三尊壽



可參病醵末由仲壙訣蕭章懷舊淚空含

沙溪先生壽八十四

歲慎獨先生壽八十三歲士方八十一歲夫婦過重半宴而相繼逝去故云云

次趙疑望

世煥

丈韻呈不憂堂案下

吾魯根基遡厥初百季修德此安居謙恭孝悌心為  
實名利榮華事却虛天慶已令鍾子姓人功正好着  
經書看教箇箇成蘭玉香耀盈庭又滿除

寄閔彥暉二首

生意無容一息沉方看拱把秀穹林從來說理無幽  
蘊只患今人少實心

中庸二字不待後人之贊歎如此却恐徒歸

於把弄

此學元來有本根工夫真積自逢源晦翁未善如愚  
句欲向吾賢戒易言

來教忠恕多言之語正與晦翁所斥多一唯

之句

見節要答徐子融書

意同曾看節要此段否當取

之如今日親承可也

示李生

萬善

二首

乙丑

安身家室眾情同何事棲遑凍雪中歸去閉門要自  
養莫嫌人誚病心風

言忠行敬守貧廬何處人間不可居萬事在吾非預



外請君歸質聖賢書

追寄李景甫

空山歲欲暮離憂正滿襟珍重我賢友冒寒遠來尋  
命駕古人義何處見斯今三宵得聯枕忘却痾痲沉  
居然聚散情悵歎不可任佇立望行李掩戶還獨吟  
外患好修省相愛貴規箴願言勉君學惟以慰此心

次任甥俊卿

震英韻

丙寅

十日新春節乾坤未解寒無心問外事閉戶卧空山  
苟使中無媿何憂迹不安堪嗟二三子論議漫爭閑

次金大伸

宙一韻贈別

一笑相迎積阻中可憐鬚白面猶紅莫言四十季前  
事志業如今盡脫空

朴和順

成阜丈挽

藹然清謹一心醇吾幸於今見古人兩世同庚偏義  
重十季薰德更情親香山故事方稱壽白鶴新詩遽  
返真病蟄莫趨蒿里餞薤歌窮谷獨霑巾

李兄汝詢

舜岳

自麟蹄寄生蓼數本種之盆中

新芽挺生喜而詠之

丁卯

亭亭玉立小窓間來自寒溪萬疊山不是閑人要玩  
物且將生意對衰顏



李正言李瞻斗岳挽

世諒那重說心親已十季天資多悃悞俗態遠僂儂  
釋褐雖云晚為官忌向前薇垣輟諫草峽邑試歌絃  
末疾初無妄秋風竟未痊公私失良士脩短奈蒼天  
切切琴心痛藥藥孺慕憐金江舊遊處回首更悽然

聞姪子輩會淨寺有感二首

生離死別獨惆然歲暮窮廬百病纏爾輩團藥真可  
羨中宵思舊更無眠

人倫日用道斯存外物區區不足論忠孝如今恐全  
墜各須努力振衰門

淨寺即吾家之鹿洞也光陰易逝少壯難再  
少者固當及時勉勉而蹉過工夫尤宜百倍  
每作斯會相與切磋其庶幾乎

次羅顯道平康縣衙壽席韻

居家知善養領邑又佳辰黑綬斑衣映朱顏綠鬢新  
樽前遲白日地上見仙人盛事宜歌詠文章媿有神  
步示族子大教

憐爾沉痾尚未痊長將藥裹作因緣箇中也有工夫  
在前路悠悠限百年

次士元送顯道謫寧邊韻



嗟吾一窮人屏伏宜沒世何事值火澤無端見曳掣  
既有妄見誤寧無私意蔽樞機固未慎尤悔仍相繼  
羞辱及先人自訟復何逮斷斷二三子謹議一昭揭  
此道僅如綫方將以身衛庶幾仰天日廓然開氛翳  
故事聞折檻誰人為叩砌至誠亦難通嚴程指天際  
本欲盡義分初非有較計時運自消長行止孰使泥  
遙知陟配處白雲愴凝睇莫以么麼謂唯觀所關繫  
要將見場出安能知駕稅為私復為公中宵浪流涕

閱相劄有么麼小  
官縱悖無忌之語

金同樞 鼎黃 文挽

戊辰

判尹威名鎮塞垣松庵義烈著南藩銅章兩代官雖  
屈榆社當時德更尊袞袞世家來許遠振振夫子稟  
尤敦人心自合祺祥集獨樹爭看翰葉繁慶洽重宰  
傳盛事壽陞樞宰荷 隆恩天年享畢辭塵世真宅  
歸安近舊原百載托隣情款款平生承晤色溫溫居  
然此日成今古蕭挽悲吟淚有痕

滄江金文挽五首

江湖身世早超然清福人間八十季榮辱已忘塵白  
外是非那到水雲邊優游暮景唯三逕陶寫閑情幾  
百篇門館如今奄寂寞黃花階上為誰妍



殫誠賢院繼先公衛道隆師詎計功一派滄江流不絕長教後世仰遺風

一方耆宿盡凋零舊德於何見典刑孤露秋來倍悽愴不堪寥落掩山扃

荷愛平生骨肉如慇懃招我卜江居祇今高義那重見箱篋猶盈手惠書

山間精舍憶陪遊物色依然似去秋今日獨尋陳迹地欲吟薤曲淚先流

金天錫挽

可惜寧馨子英英好秀才音容已冥漠書笈竟塵埃

伏枕憐吾病吞聲未洩哀空將詞一幅送爾向泉臺

次挹陶堂十詠韻

并序

余以自作之孽見罪於時知舊多絕交者昌原俞君道叔曾未一識忽惠然來過豈以所坐同累故耶還可媿笑也道叔有行役于湖南歸路再訪袖所謂挹陶堂十詠者見示蓋挹陶卽道叔之堂扁而就歸去來辭中拈出十事以爲詠也歸去來一辭固騷人墨客之所共咀嚙或步其韻效其聲響者有之或集其字述其意趣者有之猶未見有此一格清



新超絕儘可喜也余重以衰病不能爲鉛槧  
事久矣愛其題目把玩之餘不覺吟詠之形  
于口也遂次而和之

只要容膝安非關倚窓傲若嫌人侮之傻非真高蹈

右南窓寄傲

勤力耕耘中吾家本分事可笑卒歲勞能得幾簞食

右西疇有事

乍看雲出岫還疑山似雲朝暮供閑玩令人忘戚欣

右出岫孤雲

晨飛暮歸林物性有禽鳥悠然見天機幽興知多少

右知還倦鳥

偃蹇棟樑具不怕冰雪寒山中無汝伴誰與日盤桓

右撫松盤桓

曳杖難優游荒蕪當手薙草去苗始長旣耘又須耔

右植杖耘耔

菜果頗羅列庭階淨掃灑世間情歡事無如親戚話

右親戚情話

無絃孰爲耳有冊空埋頭誰就百季內遠懷千載憂

右琴書消憂

孤往誰從我凭高一長嘯林鹿尚可羣呦呦莫驚越



右登皋舒嘯

清流無濁物爽口有新詩興來音瀨瀨風轉影漪漪

右臨流賦詩

哭李龍叟 玄老 二首

如君誰謂老窮廬九尺堂堂好丈夫五十七季同一  
夢可憐埋沒向黃壚

蓬亭遯院昔同行鵲舍巖齋意更誠萬事非關已陳  
跡空悲志業竟無成

淨寺示子敬子恕二首

眼暗看書倦神疲撫枕頻無心度永日還媿鬪暮人

世態如雲變光陰似水流平生多少志堪歎老全休

聞琴岡李相國欲致仕復歸江右舊寓為賦一

律擬迎候之用昔季酬唱韻

草堂無恙舊溪隈平地神仙後寇萊戀 主暫登廊

廟去乞身還逐水雲來固知進退憂長在且得湖山

眼重開病螫自憐人事絕隔江何日一趨陪

申執義元瑞 命圭 挽

今年是何歲親舊多奄忽忽見挽幅投嗟君亦已卒

斯人竟止此驚惋久未歇內外世德家偉然好風骨

策名登明廷才猷方奮發鵬圖未展翮驥足偶一蹶



十載南海上歸來已白髮路周得邂逅爽氣猶鬱勃  
誰言優長休不復朝 金闕世道又如許賢俊空埋  
沒浮生過七十八龍俱揭揭福哉憂何憾安歸故山  
月病蟄餘殘喘逝水悲汨汨幽明欲一哭山川邈難  
越呻吟強題詞題罷獨愴惚

韓判官汝翼

聖翼 挽二首

己巳

恂恂表裏儘天真末路於何得此人託契未須論世  
誼披懷常自覺心親暮季正歎淹微宦一疾那知欠  
七旬伸屈世間終有報滿庭蘭玉摠彬彬  
龍溪一別十經季每憶從遊獨悵然世事似雲真善

變吾心如石孰能遷歸期屢喜書中見凶計翻驚夢  
外傳衰疾于今負迎哭不堪流涕寫哀篇

寄西溪二首

大兒義頰筆少兒韓歐文千秋二才子藝苑流清芬  
人生塵世間頑濁動成羣縱有壽富貴一善無足聞  
木秀必見摧蘭薰宜自焚悲來可奈何纍纍眼前墳  
大兒死於直少兒死於忠千秋兩學士正氣摩蒼穹  
人生宇宙內百年如旋風轉瞬盡腐滅何異草間蟲  
芳名在簡策烈烈無時窮悲來寫此語遠慰西溪翁

崔生慶之

慶胤

歸櫬挽

庚午



一病經秋竟未佳可憐書笈已塵埋魂去故園留不得也應飛過舊山齋

琴岡李相國挽二首

世道悠悠直至斯如何夫子又騎箕平生大節兒童識千古高名史策垂舊秩渙恩天意感斯文摧棟士林悲鰥生永負生芻哭窮谷空吟老栢詩  
猥憑先契託幃幃吾幸於今見古風己在高軒尋陋巷還從前席爨微衷誠心豈憚身為黨自孽終慙我累公來未能迎去未送幽明唯有淚盈瞳

元月五日題

辛未

平生少季日逢新心若驚既憂學難進又恐志未成如今便衰朽逢新心自平唯待死期耳萬事都無情閉戶坐悄然窗外寒風聲

得和叔書

淑慝豈多言唯在一箇心心雖巧藏之鬼神傍昭森天定自勝人此理無古今任他夸毗子世上徒林林三復我友書為之又沉吟

次明村菊秋壽席韻

軒窓宜煥復宜涼曾道賢郎好肯堂彩舞迭供常日樂華筵又奉萬年觴康寧備享純誠格志節彌堅義



訓長更賀亭亭珠樹下挺生叢玉慶無央

歲丁卯冬朴甥士元以明季戊辰為老姊周甲  
陳情乞邑蒙 恩特許自玉堂東壁出牧坡州  
明春正月十日初度將盛設壽宴老姊不欲也  
且謂子與明村同事其大夫入方抱倚閭之戀  
我獨享亦不能安於心也遂不果設轉眄之頃  
已作故事今讀明村壽席諸詩既感福履之無  
疆重悼我姊之奇命不覺流涕詩云南山烈烈  
飄風發發民莫不穀我獨何害三復之餘遂書  
以寫哀

經帷乞得大城專甲子還周上戊季孝子淡誠思備  
物慈懷多感抑開筵消沉忽已成千古哀怨無從籲  
九天却歎福門無限慶不堪孤坐淚雙懸

趙松谷 復陽 丈遷葬挽 不果

當時文德冠朝紳一節三朝號蓋臣虎逝龍亾知幾  
載陵夷河決到今辰新阡舊幸隣先壠真宅還聞返  
海濱病伏莫趨觀禮後公私百感但沾巾

朴元老 世耆 挽 壬申

昨季哭牛谷今年公又歸儒林失根柢吾黨復誰依  
嗟公孝且友二難其庶幾平生絕外慕七十守林扉



德義拔衰俗知者固云稀賢人沒蓬蒿末路良可唏  
松楸共鶴原生死願無違病伏負墳訣幽明淚空揮

姜僉知 大後 戚叔挽

先人中表已無存唯有吾公壽獨尊五馬昔季尋魯  
巷一書前歲慰莊盆每憐病螫難重拜孰謂儀刑奄  
九原萬事祇今同逝水欲題哀挽淚先昏

崔進士 綺翁 挽

短命曾悲卜汝賢嗟君奄忽又胡然前人德業終誰  
繼上舍身名祇可憐寺裏挾書今似夢松間握手幾  
經季無由一哭秋原去蕭挽歌成老淚懸

夏日坐睡睡罷吟成

眼疼廢佔屣脚痺廢危坐書生伎倆本無多可笑拋  
盡成甚麼行季八八六十四萬事人間甑已墮從今  
至死更何為竊比粥飯僧也可

拙句錄奉院齋文會二首

門牆寥寂草生庭壁裏空藏古聖經今日喜君來秉  
拂可能提喚眾人醒 右呈彥暉

益友多聞未易逢古人明訓比麻蓬一番會得旋能  
守銖寸成功至處同 右示聖汝

鄭君啓 世沃 一秋再訪畱宿而去臨別口號



山中罕有好朋來終日幽懷不自開良晤一宵還未  
寐隔窓松月影徘徊

子敬移居欲往觀而病未能焉吟成一絕

小溪如帶占西東山下茅齋似畫中却歎往來筋力  
少倚筇相望兩衰翁

歲壬申九月十八日監役叔父宅設重牢慶禮  
禮畢仍行宗會

五福箕疇壽最尊八旬齊老始吾門

吾先世以來所  
未有也故云始

重牢古籍文雖闕盛事人間禮必存鶴髮韶顏添喜  
色霜秋和氣變春暄若爲繼繼膺餘慶孝謹家風日

共敦

孝謹之風不衰則壽考之福可致曰歡  
慶之餘略申欬勸之意以勗宗人焉

朴徵之 恭徵 挽

市翁門下早相親屈指如今四十春少日心期良不  
淺暮季蹤跡各成陳山川竟阻平生面風燭翻爲隔  
世人千里無由展一哭薤歌窳谷獨傷神

次明村壽席韻二首

福履如川至清詞逐歲傳瞻言增燕賀披讀却風痊  
更喜多賢友爭來祝百季自憐人事絕無計一登筵  
良辰媚霽景和氣溢深盃善積千災去家平萬福來  
人間王母見天上碧桃開日影何須繫壺中本不催



次明村諸韻六首

紛紛當日事懇懇一封疏豈必須公議唯應付史書  
參差分路徑造次割門閭利害都消後看他作計踈

右次鐵甕漫吟韻

孰謂都城近超然似隱居非無要路迹自與世情踈  
管取閑中樂耽看老後書桃源何處是未必憶山廬

右次記懷韻

老去身長蟄親知日覺踈地遐常阻面優闊又稀書  
感子誠無斃慙吾計墮虛秋懷正慘慄翹首意茫如

右次見憶韻

老去心全懶親知我自踈難將方寸語寄向數行書  
世味殊甘苦人情見實虛今時祇已爾古道竟何如  
幽人有貞吉君子無閑愁歲暮漫成說參同何處遊  
園松傲落木籬菊媚重陽物色眼前玩流光空短長

又次即事韻

李宜寧 台長 挽

奕世風流世共知嗟君潦倒亦堪悲半生生活計青氈  
冷暮歲功名黑綬垂猶謂稀年終享福誰言一疾遽  
無醫古來伸屈如環復諸子彬彬摠白眉

次子敬子恕相和韻二首



義理難分一與中各將頭畔競南東多恕近顏言近  
訟何修可免忝家風

子莫之中猶有求中之意而執一而不求中  
者尤不可說也東頭不見西頭是南畔猶嫌  
北畔非者乃晦翁詩也其下句曰多謝聖門  
傳大學直將絜矩露天機尤可三復也

古人無辨豈嫌疲在理當然無可疑反己淡時責人  
淺和平氣象自心知

若以為疲而不辨則雖不辨而猶有求辨之  
心存焉聞過無辨自是道理當然也反己而

不尤人則淡省密察自治淡切心平氣和意  
象舒泰務欲置我於無過之地則是心便是  
私狹之意故心氣躁擾無益於事而反添其  
過此古人無辨之義也

次子恕韻二首

癸酉

花草休論癖有無庭除宜潔未宜蕪秋英不厭多三  
砌冬藥何妨更十株梧照月時窩似洛竹成塲處谷  
疑蘆誰知迂事非迂事料得無人復笑吾

其一則竹塲也

晦翁蘆峯雲谷絕句

花草平生癖自無庭除左右盡荒蕪前秋始種菊



三砌今日初移梅兩株着地碧梧纔出握當窓鳥  
竹僅如蘆迂儒也好治迂事任爾傍人竊笑吾  
生涯六十有餘季餬口非關數畝田負石防川也費  
力不如高卧且閑眠

寄題九棠齋九首 并序

久要九棠齋記心不敢忘而年來衰病幽憂  
汔未有以仰復豈勝媿歎第觀前日所示記  
文文雅而實該即無待於他人之發揮矣唯  
於呻吟之中得此小詩九章蕪陋不足觀而  
不容終孤不鄙之義謹此寫呈一以謝逋慢

之責一以寓感羨之意幸僉賢之諒察之也

月籠之北洛津東數疊青山一畝宮桑梓松楸傳世  
世真醇孝友見家風

人能積善自天知壽祿當年世莫追更有兒孫生衰  
衰玉叢蘭茁競參差

小齋栽得九棠花王氏三株未足誇想在怡愉湛翁  
日人間一樂樂無加

舊業重修泣血餘棠花如昨照庭除油然大被連長  
枕宛似前襟與後裾

架上詩書手澤新由來不數滿籬珍如今夙夜知何



事唯有工夫要立身

立身非謂覓科名希聖希賢古訓明次第知行在方冊始終惟貴一心誠

斯征斯邁共成功然後方稱孝有終看得孳孳為善地生祥降福更無窮

九棠枝葉日森森觀者爭稱寶樹林要使芳馨長不改方能不負命名心

自憐殘喘老江南孤首情懷日不堪強把詩篇歌盛事令人長羨淚空含

酬朴喬伯 秦漢

窮谷蓬蒿一草堂君詩好事說林塘且欣佳友來聯

膝安有高人可拜牀應世思淡難愛助省躬功闕得

規良今季再晤真非意他日那堪又異鄉 高人拜牀一作豪人

上牀應世思深省躬功闕一作語及行藏還從怠欲

林文甫 換 挽

十季睽闊隔湖山懷想長懸伯仲間每歎優游享清

福誰言奄忽謝塵寰親知落落多乘化衰病沉沉獨

掩關蓬島舊遊真一夢薤歌南望涕空漣

有感

於人於事每多隨名義回看可忸怩實德未充行不



得終朝三歎昔賢思

易曰不拯其隨其心不快夫有隨者乃在下者之事在上者則有拯而無隨也於家於鄉於世莫不皆然若為人長而隨之則其為可恥不但不快而已然此自無實德之故也古人如王烈陽城之類不言而人信服之行而安有不得者乎今人之不及古人者只在於德之實不實德之實不實只在於心之誠不誠可不懼哉可不勉哉

又示子敬子恕二君

君看雍也問仁章敬恕真為寡怨方日用工夫在心

上唯將理慾驗存心

曰顧名思義之意及於二君之字實過慾存理之心法也

又示兒輩

家門一語醒人淡保守無他在此心口說富貧猶可恥况將些吝着曾襟

此有感於惠教婦翁之言也人情厭貧之實而愛貧之名愛富之實而厭富之名亦可笑也營生之念日濃則道義之味日淡良可警惕

有傳和叔示學子詩者用其韻



精神筋力已無餘萬事如今儘墮虛歲去窮廬長索  
莫時開殘帙暫敷腴一番心迹人須識平日朋交我  
自踈安靜唯思歸造化夜眠朝食是工夫

都君慶星挽二首

安分生涯靜且清感君為善一心誠恂恂行義聞鄉  
里身後無慙處士名  
慇懃來訪憶前季分手山門久悵然病螫自憐人事  
絕一盃無計奠靈筵

成汝中至善挽

半百不稱天多男可謂福平時得安歸浮生更何憾

獨余竊自傷茲心子應識世道一至此斯文復當厄  
巧讒僅舊辨諛辭又新作人情盡螿變義理方榛塞  
誰哉立頽波共守如綫脉春書欲秋訪此事擬講得  
君去失右臂我存已拱木一酌遠未能孤懷何處托  
空將數句語寄向靈筵哭

朴參奉鴻達挽

龍華山下一茅亭暮歲官名只寫銘冉冉浮生同逝  
水不堪耆舊日凋零

尹承旨子文彬挽

甲戌

石江同隊少時遊屈指如今五十秋前歲逢迎真邈



迥一場談謔尚風流沉痾下壽齡非促晚第銀臺宦  
亦優浮世歸休早晚事薤歌空復淚盈眸

寄題尹生元亮

周朝

松陰精舍四首

數間精舍碧松陰謔謔清風自古今一箇簞瓢無外

事相傳只有歲寒心

元亮之先有隱君號碧松居士松陰即所以肯堂也故云

慈孝熏成滿室和萱堂日永樂如何事親至老誠難

得無限人間泣蓼莪

元亮又以忻永名其奉老之室以願豐名其燕居之所蓋貧士

力田養老願豐其至情也右咏  
欣永齋鮮民情事不覺羨嘆

雨順風調歲不貧薄田猶足養吾親也知憂國還非

分且祝 君王及老仁

右咏願  
豐齋

問君曾讀晦翁書本業終身此可居孝悌其間一事

耳願言三復切磋如

右次其見示韻以廣其意朱子答郭希呂曾無疑書云云

羅顯道大夫人挽二首

安定風標守夢孫淑人賢範叶高門當季佐內持家

肅到老承先式禮悖孝有二兒知養善仁徵八耄享

齡尊階前蘭玉方成列餘慶應看世世蕃

年年奉和壽筵吟喜懼恆同孝子心方幸北辰誠上

格忽驚南極彩旋沉霞觴未遂升堂祝蒿里終孤執

紼忱強病欲題蕭挽字蓼莪情事淚難禁

監役堂叔父母挽二首



夫子夫才早出倫令人聞輒亦稱純閑情晚得江湖  
樂遐筭偕看八十春壽爵榮封期百歲鳳飛鳳逝歟  
今辰也應不盡留餘祿蘭玉繁時有席珍

六世三傳二百年幾新堂構汔巋然孝思不替前人  
錫遺澤方知後嗣延令子當時悲早夭先祧他日愴  
俱遷白頭病姪懷千感蕭挽吟成泣逝川

後村舊基即故部將洪公宅也洪公始卜居  
于此云洪公無子傳於女婿僉知柳公柳公  
之子忠義公無子傳於吾曾祖參判公參判  
公乃忠義公之妹子也參判公傳於季子司

議公以故司議公奉柳僉知忠義兩世之祀  
司議公卒後監役公仍奉其祀監役公之胤  
進士楷早歿今此三年之後則柳僉知忠義  
兩公神主當一時奉祧而埋安矣人事一變  
不勝懷舊之感故特述之云

李景略挽二首

感君平日分能安生得安時死亦安今日送君無別  
語一丘真宅萬年安

景略常以安分名其堂為詩自述其志云

一醉一醒始遇君真心高義孰如君如今曠訣無筋  
力悲媿幽明我負君

余始遇景略於執中家景略大醉求余文為小序以贈之忽忽



三十年餘矣  
可悲也已

敬次金僉樞峻令丈重宰宴席韻二首 乙亥

絲觴花燭宛初筵鶴髮韶顏閱幾季共向人間看福祿不須天外問神仙兒孫迭奏斑衣舞賓客爭陳慶壽篇盛事真宜留作畫蕪詞自媿未堪傳

二水交流好着居清貧家計憶當初室中琴瑟供和樂帷下詩書任卷舒桂馥蓮芳榮果早緋章紫誥慶還餘須知箇裏工夫在多少休祥得豈虛

姜正禹寶錫圭挽二首

才名少日繼家聲縱靶青冥路始亨一蹶歸來頭已

皓可憐埋沒送平生

依然談笑憶天真一別如今十四春病螫無由蒿里餞悲吟獨自淚沾巾

謝懷川宰姜叔九錫範來訪次其見贈韻

山中少好客獨寐咏槃阿百里每來訪感君情義多

天俊上人來自水落喜聞西溪信息次其軸中韻以贈之二首

衰季一味愛清幽僧軸猶嫌近俗流為被樵翁勤指

送試拈枯筆不能休西溪自號樵叟

石林庵在水山西頃歲曾為半月棲黯黯老懷忘不



明齋遺稿卷三  
得有時魂夢繞雲谿

亾友俞胤甫室內挽三首

晝哭于今歲幾夏一朝風燭使人驚固知劍會前期  
在其奈舉魚泣樹情

孝烈成雙罕世家旌閭贈杖 聖恩加如何一子猶

無嗣天道難徵命可嗟胤甫於市南先生疾革時所  
指進血救人於胤甫之病亦

斷指事聞命旌叔人之  
間贈胤甫副提學以褒之

平生情義若天倫思舊當令感愴新此日無由夏一  
哭雪中西望獨傷神

丙子元日二首

平陂往復若環然周甲崇禎又九季四海不應無一  
箇悠悠何處問蒼天

人生如石苦頑然歲月重驚丙子季白髮滿顛何所  
事不如遄去入黃泉

次李正字剛仲彦純見贈韻

病來書架久拋塵倚壁時吟懶是真非分 恩榮恆  
負罪殘年粥飯敢言貧精神忽忽全如夢時節滔滔  
又遣春慙媿君詩多過實莫將蛛腹擬經綸小說有  
蜘蛛滿

腹經綸  
之語

剛仲委訪問易啓蒙臨別書贈



易道非他妙君應驗一身先亨翻有否既屈詎無伸  
坎艮看時用山天要日新遠來何所報言出怕煩人  
所謂伸非必以外物言身困屈也心亨則優  
是伸仕塗之枳屈也學業之進則又是伸蹇  
之象言反身大畜之象言畜德恐最切於受  
用故拈出言之未知以為如何

和佳谷叔父回科宴詩

蓮科三八振英聲一百生員第十名六乙重回大淵  
歲朋樽聊慰暮年情遼陽仙鶴誰相識南極老人唯  
自明箇裏白牌尤可貴今時那復見崇禎

叔父以萬曆壬子生崇禎乙亥司馬前季乙  
亥為八十四歲揀也為設酌獻壽誠世間稀  
有之事也同榜無一人存者而親戚故舊凋  
零已盡故第三聯云云



明齋先生遺稿卷之三

明齋先生遺稿卷之四

詩

金高城

盛達

挽

丙子

海上名區別有天誰言一去便登仙人間短筭未周  
甲身後清詩空百篇黑綬休嗟官祿薄青氈可喜子  
孫賢溫溫風味還如夢蕭挽歌成獨愴然

徐子良挽二首

少日期君亦不輕那知才氣竟無成可憐短筭纔著  
策應有餘祥在後生

舊遊回首夢依依常歎季來會面稀衰病祇今人事



絕一觴無計餞君歸

自訟

平生訓戒在無心心裏能忘在耳音一語忽差三失  
釜中宵起坐獨沉吟

送別顯道西歸二首

丁丑

三百寒程六十翁今時幸見古人風一旬對榻言無  
厭海內何人此意同

衰病年來不出門自憐心鑑日昏昏南山送別無筋  
力為誦遺篇勉共敦

晦翁和南軒別章有勉哉共無數此語期相敦之句

金文伯

廷煥

大人挽二首

居憂八耄禮無愆甫過琴祥去似眠歎息今人多不  
及為公三復素冠篇

交臂居然一世忙同鄉人事若他鄉溫溫令子相從  
久強寫哀吟和薤章

金僉知

渠

挽三首

文元文敬兩先生名世宗儒是父兄九十天季享餘  
慶人間何福與之爭

纔逢季老問興居正賀前頭百亦餘觀化一遭還似  
睡滿山霜葉萬緣虛

屈指相從五十秋年來世事劇雲浮披襟一笑今何



得感舊悲吟涕自流

次顯道寄示舍弟韻三首

殘生已如許萬事盡灰心只願逢親友開懷發朗吟  
親友亦難遇憧憧空有心無端憂世念時復浪沉吟  
憂世還非分唯存兢戰心兒曹憂口腹無語但孤吟

檀質夫

以銜

挽二首

戊寅

志氣當初儘可期早季拋棄使人悲如今醉逝尤非  
意草草身名竟孰知  
師友平生義可忘至言先見尚心藏君歸欲報吾身  
事二十年間語實長

子敬挽四首

今世誰稱獨樂園優游畎畝亦君恩完人末路真  
難得好趁時平返九原

鳳飛鳳逝歟相隨劍會延津亦有期真宅不離先壠  
側孝思長作子孫規

階庭養得雙珠樹宅相仍看袞袞生經訓苗裔遺後  
足何憂他日繼家聲

開窓終日望園林獨坐悲來不自禁一隔重泉那復  
見只應時有夢相尋

申右相叔弼

翼相

挽



明齋遺稿卷四  
斯文有正脉百世宗坡潭晚翁與楸老孔門譬兩驂  
再世得吾公兩家美所涵粹姿映圭璧高材拔稷枏  
明廷雅望屬塵試左右堪侃侃文景業廊廟可無慙  
世道喟交喪真偽復誰諳牛溪末季事不惑俟晦庵  
諛辭忽新作黨禍仍相參士氣鬱未舒吾黨口豈暗  
一闢蓋有待此任孰能擔唯公若砥柱濁流不得函  
海內同志士視公爲指南騎箕何太遽朝野共慘惓  
善類更何恃天意實難揆虛名誤天寵溝壑分是  
甘平生知己感中夜歎再三永負雞絮義悲慙不足  
談空吟殄瘁篇西望淚獨含

羅教官仲輔挽四首

安定風聲奕世傳長吟亭後得吾賢高情遠識人誰  
似半百光陰祇可憐

君啓平生最識君布衣憂國儘無羣如何未展朝陽  
志終作江湖一散人

元方之篤季方豪孝友君家德義高忍想琴亾無限  
痛彷徨陳迹獨悲號

書中切切每相箴今世何人似子心畏友殘季那更  
得悲來時復淚沾襟

鄭廣州士詹

齊秦挽



名門佳士早蜚英雅望清朝自不輕湖縣奉輿留舊  
惠漢山超秩荷新榮流丸外至何須歎風燭俄傳劇  
可驚伯仲平生情義重祇今無語慰賢兄

鄭君啓挽四首

每歎君才困下流如何半百俊長休可憐身後誰知  
者唯有奇文似柳州  
末俗曾聞比素絲如君正見孰能移窮途抹掇猶常  
事不得長年數益畸  
魯詹當日作龍雲仲輔平生最愛君前後相隨如水  
逝眼中那復見斯羣

松楸節日輒來尋月照山窓好款襟此夜思君已千  
古清光依舊到天心

金承旨 洪福 挽

銜 綸當日識芝眉傾蓋曾聞似舊知自孽還慙空  
污善公心益歎不隨時每思此世重相遇孰謂今朝  
去莫追欲把蕭章寄一慟云亾豈獨哭吾私

次再從弟天縱 揀韻 還寄二首

幾年誤逐塵緣去今日好尋初服來卷裏聖賢如舊  
識人間名利儘浮埃方看真樂餘簞食何用閑愁借  
酒盃五十立跟猶未晚願君將此告靈臺



歲暮窮簷惜短暉一生真作蠹蟲微堪憐舊帙空盈  
架且愛羣雛競習飛何日時來歸造化無心分外說  
行違如君尚有前途在剩味真腴老益肥

又以一絕申奉勉之意

開門授學古人風於己於人最有功况復遺規宜善  
述期君事業在閑中

次韓文卿配周述懷韻二首

靜裏能觀萬物春古人糟粕可怡神要令閑氣胷中  
省方見真功卷上新慥慥唯當檢言行悠悠何暇問  
譽嘖老生心語君須信恨不姑畱寂寞濱

守靜終為第一方洛行何事又恩忙如今只合交相  
戒泐水尤當味卒章

次李君源滄公達澳書社唱和韻二首并序

昔子路之對夫子曰何必讀書然後為學則  
孔門之必以讀書為學即此而可見矣或問  
於晦翁曰先生教人有何宗旨曰某無宗旨  
只是教學者隨分讀書然則朱門之學亦唯  
在於讀書也蓋書者眾理之所會而古聖賢  
言行莫不在是欲窮理致知而學為聖賢者  
捨是無他道焉噫今之學者讀書者蓋鮮矣



不讀書而言為學猶不食而求飽也安有是  
理哉延安李君君源公達兄弟自洛捲家歸  
鄉廢棄科業而專心於為己之學蚤夜以讀  
書為事又推以與同志者共之相與立為程  
課相與討論而切磋之相與誘掖而勉勵之  
實吾黨之莫大好事也若繼之以不息工夫  
無有間斷長趨闊步日征月邁則蔚然而成  
就者可坐而待也二君又相與唱酬以道其  
志公達間以示余三復詠歎之餘謹次其韻  
以效區區悅慕之意云

外面先從辨哲愚實心為善聖之徒明誠極處為真  
的敬義雙行是正途慾寡漸看心境靜朋來何患德

隣孤朱門有訣尤先讀聞道前修譬一壺牛溪先生抄朱子書

為學之方為一冊昔先人凡來學者必使先讀之聞  
滄浪翁嘗題其冊面曰中流一壺蓋取古語中流失  
船一壺千金之語餘  
其極要切也壺瓢通

曩棄其身即下愚了寧古訓戒吾徒仁為自己千句  
任聖是儒生萬里途此事必由勤乃得初心莫遺老

終孤湖南輟響季踰百今日相期復見壺湖南昔時  
上道有李

一齋下道有金河西奇高峰大為一時之盛矣其  
後百餘年來寥寥久矣壺山即湖南上界故云云

次農隱韻二首



平生志不在羣飛淡寂唯思卧閉扉作邑何嘗變素履居閑已覺息塵機貧家活計從吾好儉德工夫復孰非漫興邇來頻試筆香山句法漸依稀右述本志光陰七袞儘如飛垂死窮山掩草扉微分只宜潛蝨跡浮名何事觸危機心中縱謂無慙悔世上安能免是非見道分明真不易祇今臨事苦依歸右答見箴

領願長短吟示舍弟及從孫東洙

祖休官孫廢科廢科工夫大休官滋味多滋味在何處老眼看書芻豢無以過工夫亦何事闊步正路所至誰量他只是餒在中呵呵將奈何

李一卿萬善挽

世間衆生諒擾擾濁者常多清者少嗟君高才亦難得性理源頭早透了由來造物類好劇奇疾平生苦纏繞可憐美質竟何成半百光陰如過鳥祇今老病人事絕遙想空山送丹旌欲將蕭歌寄一哀寒夜悲吟到窓曉

贈別重教歸維鳩

己卯

愛爾心存學嗟余老已衰相從有底益別去祇堪悲尚志能安分研書可樂飢隨身一敬字勉勉慰吾思

謝別河生達海



君平為卜依人事康節言占盡天理平日語君君不知願君勿復來吾里

輕言禍福妄談休咎喜道方外妖誕之說皆殺身亾家之道也與君相知終恐有意外之患茲以告絕幸勿怪也

李大興季通 延普 挽三首

晚翁門下昔周旋難弟難兄見二賢三十年間盡冥漠可堪懷舊獨潸然  
常謂君才可遠期風標綽有老成姿鵬圖未展歸長夜朋友相嗟惜數奇

相對歡然寫此心邇來情與義俱淡幽明一哭嗟無力數曲哀歌和淚吟

悶旱

天時人事若相催國步民生儘可哀屈子長季何足願不如瞑目卧泉臺

金監司 盛迪 挽二首

文忠文正兩先生節義吾東日月明一代名門如望歲同時諸子競蜚英方看袞袞追前武何意恩恩輟遠程未說同朝共驚惋 九重還復愴 宸情  
伯氏云亾未四暮如何君又至於斯薇垣不及趨



新命棠茂空令寄後思義感每來尋陋巷情慙無計  
哭靈輶蕭歌一曲遙相送重為公私淚兩垂

次文玉詠曆

不覺新年已九旬滿山花色即佳辰故人書至還同  
感天地悠悠度幾春

又次其新居韻

儒冠何事誤吾人却恐吾人欠省身學似着衣兼噉  
飯命如霜葉與花春主翁若得存安宅 聖世無妨  
作逸民園竹庭梅儘閑友未須呼喚強誇貧

學在日用非別件事也古人比之常茶飯凡

人之推與別人而自安於流俗者乃以學為  
別件事故也人之所稟莫不有數康節詩曰  
災殃秋葉霜前墜富貴春花雨後紅言其不  
容人力也人如知此則可以隨遇而泰然矣

沈處士澤之之瀨挽

獨葆幽貞七十季世塵那得到林泉初因令姪欽聞  
義晚接芳隣喜識賢衰病幾興離索歎情懷時付簡  
書傳如今執紼無筋力泣寫哀章寄二連

和 玄石迎謚禮成朴生泰晦書示崔申諸公詩要



沉潛聖學一心誠本末分明有古程經世宏規依德  
水編書盛業法真城爭看壹惠新膺 命誰識斯名  
可稱情同志百季餘後死更從何處訂權衡

閱國賓 以觀 挽三首

吾鄉良士孰如賢和緩尤宜得永年一疾經旬奄長  
逝浮生脩短奈何天  
伯君之天尚堪嗟暉友重悲命不遐何意今季又哭  
子可憐無祿善人家  
遙辭鶴髮入黃墟不耐秋風鴈影孤悽愴平生情意  
在新阡十里負相趨

次洪九言 受時 韻

得俊宜處落俊宜消息無他偶與奇事在其間皆有  
義人當隨遇自知時少季異路何曾涉暮景同歸本  
不期一笑春風又蹉却為君空復歎棲遲

和金郎道以 時濟 淨寺述懷之作

少時愛山寺一年常半居其於進修功殊勝在村廬  
自從老病後不能出門閭觀君述懷作三復歎起余  
亟欲注從之筋力已無餘嗟君志甚美所欠少讀書  
讀書苟不勤美志終墮虛歲月儘易邁鞭策不可徐  
浮念最害事一敬能掃除區區老生談願君且書諸



又贈道以

君讀孟子書能知第一義為善與為利舜跖分於此  
利者是人慾善者是天理天理是本性為善即為己  
人慾是坑塹為名亦為利辨破善利間方會讀孟子

又兼示東洙

東洙讀論語道以讀孟子論語一箇仁孟子一箇義  
事事合義時仁在其中矣義精在致知仁熟在誠意  
知從讀書至誠自不欺始工夫要不息勗哉吾二士

宗嫂挽二首

壬寅哭宗兄癸丑哭大兄平生荷友愛至今每愴情

往季哭丘嫂今季哭宗嫂相隨如逝水惘然那忍道  
宿草三十秋劍會各有期當時少弟輩衰老已如斯  
子敬與養一忽忽又何之獨立松楸下撫迹徒傷悲  
南原三節家風承我宗事獨居奉烝嘗到老彌敬止  
兒孫滿眼前七耄猶晚社唯憐抱樹痛欲養親不俟  
昨者病裏語丁寧屬諸子殘喘已垂死何能副至意  
吾兄德未享遺慶應不墜百季存沒感蕭挽重揮淚

邊美卿林挽

龜山起南服父子師兩程望庵與紫霞千載繼高名  
後來得諸賢彬彬羣弟兄夫君號白眉向道有淡誠



早拋名利場衡門守幽貞淵源固有漸士望良不輕  
云何遽不幸遠邇劇嗟驚而余老不死同志日凋傾  
文玉昨書來痛惜如我情無由一往哭悲哉負平生  
空將詞一幅遠送九原行

子貞自洛至口號

相逢只可敘暄涼外面悠悠不足詳京洛數年何所  
得可憐頤上白如霜

酬沈上庠叔平

坡

庚辰

跡雪模糊野徑微瓊琚滿袖步依依多君美志方如  
駛媿我頽齡已度稀務實工夫終有益過情言語恐

招譏新春告别還堪悵為寫中情和子歸

故友鄭晚昌遷葬挽四首

并遷其內各葬之墓而合窆云

土中埋玉幾經年到老懷賢每愴然今日聞君移舊  
兆素車無路哭新阡

當時師友義何如萬事人間盡墮虛自信吾心猶不  
作未知君意竟奚居

情淡託子義俱臻病蟄無端負故人尚識抱翁孚翼  
意微誠獨自祝振振

右挽前喪

賢郎曾為道徽音高義令人感歎淡鳳逝凰飛影已  
斷不堪思舊寄悲吟

李君徵夏曾過訪為道平日訓戒之語不勝感嘆故敢及之



右挽後喪

朴君鴻儀挽

節義名賢後仁堂舊老儒沉淪甘寂寞褒錄謝奔趨  
素業雙男在天年八耄踰蕭歌當一哭人事已全無  
東村諸朴是成承旨外裔也 朝家錄用成  
公之裔至於再蒙齋郎之除而君以朴門之  
長不得預焉

過彥暉墓

平生志業已成埃衰草荒烟滿目哀三遶孤墳不忍  
去精靈應識故人來

李壽翁 世龜 挽

往年哭晦叔父子繼淪沒與君遠相弔悼惜尚未歇  
孰謂君未老今季又奄忽斯文失輔車吾道正艱脆  
嗟君有邃學探討造理窟平生物格說說得儘超越  
禮書最浩博用功愈致矻每得手書來使人增感發  
一州志可行風化方騰勃云何有不樂美政惜不卒  
觀化一何忙賦歸纔閱月公私劇驚惋遠近共嗟咄  
衣冠返丘山志業就埋坳一酌病未能淡慙情義闕  
同志日凋零後死餘衰骨薤歌望新阡悲風攪霜樾

俞直甫遷葬挽 父子



浮生如水去難追兩世淪亾祇可噫玉樹瓊枝猶想見高才美志復誰知千年骨肉同歸地一壑松篁似舊時後死于今人事絕薤歌西望獨傷悲

韓夏卿配夏文卿國肥配休忠卿配漢李士常

產經會于洪寓有酬唱之作文卿持以見示信

筆題其後以答之

吾聞古聖賢一生常戰兢兢復戰戰臨淵與履冰為問何為爾人心儘無恆存亾在頃刻理欲常相勝一念苟放過從惡真如崩所以君子學夜寐而夙興無時不戒懼敬義夾上升實心有實功然後道乃弘

此為一大事方冊皆可徵諸賢得文會靜裏作佳册正好相切磋德業期上層恩譴乃玉汝困窮方益

增要之在讀書畧短可繼燈書中古人語一一可服

膺一作擾擾世間事一切莫留膺表裏務整肅言行依準繩脚跟一

以立外物焉得乘方將味芻豢豈但遠罟罾希賢以希聖不為非不能老夫何足道歲暮粥飯僧昨見言志作豪氣競馳騰却恐身與心工夫欠定凝聊誦舊所聞庶以備勸懲時夏卿言事見述士常與時抹搬文卿為人齷齪故篇內云云

朴老范挽三首 辛巳

仲氏云亾二子隨善家無祿國人悲君今奄忽還如



許鬼惡天高摠莫知

聯枕前冬話舊遊共嗟時節似川流臨分尚有三春約轉盼那知萬事休

嗟君美質儘清明孝友家庭繼篤行半世甘貧安素分平生守靜恥浮名誰言短筭猶稱天可惜初心竟未成同志日凋餘後死不堪蕭挽獨霑纓

李惠仲夫人嫂氏挽

我姑古敬姜閨範甚莊肅獨稱子婦賢自慰晚景福夫人出名門天姿儘清穆敬恭奉晨昏溫惠以自牧宜家叶女則令譽洽親族克配君子德榮封被天祿

階庭簇蘭玉吉祥藹盈掬如何奄不弔中身痛晝哭伯子早致貴禍變又何暴孰謂蓼莪冤眼前重見酷哀哉不忍說天理一翻覆箚箚未亾悲劍會還相促靈輒返舊居窀穸開新卜三胤竟終孝孤孫儼重服他人猶羨此欲言淚漉漉餘慶應更遠陰隲是所祝平生吾外兄德義嘗悅伏每見齋楮日恩情視小叔如今已老病隔江負匍匐存沒百感懷不盡詞一幅

亾姊臨老見嗣子慘禍其終也饋奠無主首故篇內云

次沈明仲見贈韻却寄三首

知君晚計在寒泉更有孤松草屋前遙想盤桓獨樂



地一塵那得到庭邊

道心長處世情微却向閑中掩小扉愛說孤松知有意  
意嚶嚶歲暮可同歸

聖賢言語遠相傳文字于今已萬千但見把來求學  
祿誰能讀去到知天功程所造如關命朋友相從也  
有緣半百看君猶感慨嗟吾望八夏堪憐

偶吟書贈權生汝柔

綠

邇來多睡苦昏然喚醒時時賴有賢安得如君長作  
伴免教偷惰度殘季

仁顯王后挽詞二首

不取  
寫進

元敬吾邦古太任荷歟 淑德嗣 徽音 東朝孝

謹承 慈眷 中壺箴規叶 聖心位復長秋前史

罕誠同馬后國人欽如何未享齊天壽 宸筆哀榮

照古今

御製行錄  
仍以為陵誌

無疆 至德合坤儀天命難謾福履虧從儉 恩言

民庶泣 因山特制 至尊悲久藏垢疾知 仁性

陰隲 元良想 聖慈草莽賤臣方俟罪兢惶不敢

進哀詞

昇遐未幾宮  
庭之變始出

洪善卿

世考

挽

壬午

憶昔初逢去戊寅茫然六十五回春輔仁堂上曾先



進養正齋中即舊人三子有孫皆業學九旬除四好  
歸真如今同閑餘衰骨手寫哀章獨愴神

謝文玉來訪

百里來尋似少年何妨鬚鬢已皤然秋來更約明家  
洞擬辨雙筇候澗邊

李美叔遷葬挽二首

玉樹埋塵四十年想來風味尚依然可憐身後無玄  
晏零落清詩幾百篇  
同隊從遊跡已陳後生誰識舊情親當時少友今如  
許逝水人間獨愴神

客有誦西溪韻語者步和以寄

無妨一義與旁生大處終歸見未明所惜吾知猶止  
此非關身外毀兼名

蠹魚身在卷中生食字季多眼暫明畢竟物微誰  
見許祇應終負毀經名

原韻

又次自戲

蠹魚身在卷中生物性偏於食字明縱渠食得那知  
味堪笑虛蒙嗜字名

聞吳判書貫之道一以柩西歸病不能出哭三

首

癸未



見書未浹月觀化何太遽流聞消息惡數日如虛語  
高才竟止此世道將誰付白日不照吾無人向天顛  
木秀風必摧天高鬼偏惡人情有愛憎慶弔紛交錯  
孤旌返故山浩氣遊寥廓獨有急流節平生負一着  
光甫既早逝君今又至斯皆言酒之崇孰知天所爲  
長短或互指潔白人難追窮山獨私慟英靈應有知

次道以冒雨遊山韻

終日雨濛濛雲氣方擁鬱縱有登山約清興焉能逸  
行事貴適時寒裘而暑葛藥苟不對病害反由參朮  
觀君今日遊一何似狂發動止有常度無端逐外物

眼目迷昏霧衣冠沐飛沫何如就明窓靜坐整巾襪  
道然讀我書味如芻豢悅浮念一時除身心得安歇  
吾言如未當願以理相折

柳道卿貴三挽

每歲南中行輒來訪衡門豈惟情相親淡知義所存  
從事爲己學年晚志彌惇容儀自敬謹講質警吾惜  
逢時喜開襟別後又難諉常歎居不邇盍簪未源源  
訃書忽來投不覺驚神魂胡爲遽至此悼惜不可言  
南溪舊遊徒幾人樹脚跟同志日凋落此懷誰與論  
一哭遠未能西望聲屢吞空將蕭挽字和淚寄新原



吳貫之挽

公來不得遇公去不得送老病人事絕窮山獨私慟  
明廷失一鶚士林摧孤棟是非已蓋棺時人漫多哄  
平生趙光甫千載相伯仲愴然舊顏面追思盡如夢

己蓋棺一作在青史

次崔來叔

秦昌韻

庭中碧梧客來多賞之而未見有形於吟詠  
者今承惠韻物亦似有遇歟謹步和以謝

樊廬無長物庭樹可怡襟有月堯夫院無絃元亮琴  
誰誇一青蓋不數五楸陰忽見新詩句知君會此心

尹君則挽三首

山映樓中識面新于今四十二回春浮雲世態如衣  
狗淡水交情竟不磷

世德遺風一氣傳冰清又似鄭烏川六旬有八猶稱  
壽如玉雙兒更可憐

浮生次第不須驚何處青山送遠行三疊蕭歌當一  
哭英靈倘識故人情

李子貞挽三首

書中每說趁秋歸孰謂秋來事已非老病莫由迎路  
哭不堪孤坐涕盈衣



悽愴丹旌止一官浮雲窮達亦何嘆唯憐令督終天  
痛他日 恩榮孰為歡  
君先我逝豈曾期自少相親更有誰三疊蕭章言不  
盡君靈應識此心悲

西溪挽二首

平生直道不曾虧浩氣洋洋塞兩儀觀化如今何所  
憾空留後死枉傷悲  
考終終得在林泉仁愛 天心本不偏舊秩渙 恩  
光 聖德誰能罄效 四聰邊

又三首

好藏清豔月明中何事將來鬪雪風更有何人百載  
後却憑遺墨歎陳公  
亾羊補苴未為遲山石猶為琢玉資今日嗟嗟已無  
及此生長媿負心知  
浮生真箇似蜉蝣堪笑騷人賦遠遊父子弟兄歸復  
處唯看正氣凜千秋

送道以挈家入荒島

見子述懷作為之三歎息隱遯豈無義天山著大易  
少年能辦此千丈拔塵俗今時見古人歛衽實敬服  
區區匪有他所願急講學主學遯在中主遯非學則



為學在明善明善在書冊讀書在少壯少壯難再得  
經營隱居計汨沒餽口策光陰容易過忽然成枯落  
於理既未明到頭如擗墮空心以向道譬如迷歸客  
回首盡茫然撫己悔無益為君憂在此願君淡思繹  
若言避世謀鰲頭也海曲閉門讀吾書賢咸作麗澤  
日日有所事箇中無限樂縱有松楸行可無城市迹  
世紛雖百千浮雲過寥廓古人有靖節未聞尋窮僻  
先賢有聽松只棲坡山麓豈必海島中為能真立脚  
海島有三難願君重量度水氣善傷人第一憂病作  
出入載一葉垂堂戒可惕又有意外虞海賊良可愕

君行豈敢挽自願正多慙平生昧處身罪戾難勝贖  
行矣勉自愛明誠更努力兒已知慕賢妻能甘處約  
清虛終脫空務實方成德霜風攪別懷仰看天宇碧  
陋語豈贈言他時代面目

金叔涵

載海

示其與玄石酬答韻要余訂和

栗老當時洞大源從頭直下闢重門鑽研自有無窮  
妙豈合牀牀更費言

右總答

好就二心看一源端情那可更分門先師所指雖如  
是只合存之更勿言

右答玄石

一片靈臺是本源主翁因客始開門門開門閉無他



逕妙用何須別著言

一作運理神  
功不必言

右答叔涵

性發為情共一源如何四七更分門千秋語錄先

師意却向中間以主言

玄石原韻

俞起甫挽二首

甲申

親依門下自髫季庭玉三賢共比肩伯仲中途嗟不  
幸潘楊阿季更相憐天資靜重徵宜壽晚節優閒樂  
更全誰謂如今又奄忽百季存沒淚雙懸  
前秋寒日特來尋聯枕從容慰此心君喜我形無減  
舊吾憐子道未宜今臨分黯黯情何極乘化恩恩痛  
不禁後死世間誰與語夕陽西望獨悲吟

李海州

翊周挽

認得淡情識面初爾來二十有季餘東村歲至輒相  
訪海郡路悠頻有書晚景緋銀榮不媿盈庭蘭玉福  
誰如今朝豈料題蕭挽壽過稀齡尚少余

林處士

錫周挽

葛翁之後早知名晚向林泉作逸氓子姓滿前斯福  
祿季齡踰八更聰明書來每說思乘興人至方知己  
夢瓊病蟄末由伸一哭漫憑蕭挽寄微誠

李尚輔

光佐內挽

夫婿乘龍早寧馨種玉奇爭稱好福履孰謂短生涯



靜瑟芳塵暗新原草露滋悽然求挽語情義使人悲

李希敬燔挽三首

屈指從遊二紀餘情淡義重復誰如老余不死君先  
逝不獨悲君却悼余  
君今已矣奈如何志士難成古所嗟尚有諸兒似蘭  
玉可能勤學世君家  
每謂秋來病可蘇不逢君面見君書如今永向重泉  
去西望雲山但一吁

贈別權汝柔三首

千里之來廿日留連宵講說不能休今朝告別還何

遽奉老誠難每遠遊

殘季百志已成灰淡媿吾賢去又來萬語千言皆在

冊願君毋怠竭君才

一生清福復何求人事無他樂與憂瘦馬薄衣行色

苦別懷歸路兩悠悠

鷄鳴而起孳孳為善者樂也舜何人予何人不免為鄉人者憂

也樂此樂而憂此憂並行不悖

李生世德來訪留數日告歸口呼以贈

崑崎已作老蒼容不似青林寺裏逢桃李春華非所  
慕期君鬱鬱澗邊松

次舍弟韻寄國材



日日常孤坐無人與共談浮生誰滿百後死只餘三  
志氣雖云在形骸已不堪惟思更會合終古有齋庵

次舍弟韻二首

桐葉濃黃菊有英一庭秋色老人情嗟君莫作傷心  
語語到傷心怕病生

閉窓孤坐一聲旨總角聞無白首成符到便行良易  
事樂天何物更關情

李公達 澳 挽二首

乙酉

忠翼公門有此賢誰言美質竟無年皇天祐善終何  
在兄弟相隨益慘然

有志無成命矣夫可憐身後一兒孤蕭歌送別重泉  
去南望雲山竟日吁

題孤松亭沈明仲東遊錄二首

楓嶽瓌奇擅古今都將幻語付叢林名山解步名賢  
韻三歎高明獲我心

嘗謂楓嶽實為名山而自古無一片名賢遺  
迹不能如廬山之有濂溪晦翁陶靖節諸賢  
之流風誠為名山之一大羞儻微栗翁之作  
則殆無以解嘲矣高明一句無亦有此意思  
耶



遊賞由來只一場目勞身倦又心忙歸來好愛吾家  
景雲影天光滿小塘

記末池塘庭畔一段真箇實語亦可以喻學  
為之三復而不能已

無菴姜叔九以童蒙教官時所教弟子多為大  
小科者特陞通政階以褒之明谷崔相公作詩  
以賀叔九寄示要和

老懷灰似冷松逕雪全封一札驚何自清標宛再逢  
緋銀新 寵渥鱸席舊雍容欲和明霞句迢迢願莫  
從

尹相國仲麟 趾善 挽二首

吾宗 聖代杜韋天華胄公家最世傳父子承休推  
國老弟兄聯武上台躔忠誠有素 宸情眷清儉無  
瑕士望全八十考終何所戀胤賢先逝慶還延  
平生盛德仰先公愛感階庭嗣厚風顯晦迹殊情益  
篤京卿路遠信常通威容忽隔重泉裏手札猶藏篋  
篋中雞絮一哀人事絕泣題蕭挽痛難窮

題西溪已巳帖後

西溪生同歲 崇禎之二年弱冠即相識到老與周旋  
西溪觀化去悵然獨留焉李生推孝思傍作同庚緣



慙慙求我言書帖並來傳西溪手所書摩挲置案邊  
李生雖未見見此可知前我爲李生言當念阿翁憐  
努力勤令德勿使期望愆令德在學問學問希聖賢  
聖賢有遺訓博約斯不偏志業貴務實才華不足妍  
李生聽我言我言非空懸芳年不可玩此事正急先  
他時立揚遂可以慰九泉吉祥將焉往斯帖善保全  
右書帖卽西溪翁贈其外孫李生詩手書以  
與之者也李生糴以爲帖寶守之間以余亦  
生歲偶同也投示求和披玩已成古迹余悲  
西溪之先逝又感李生之誠意遂步其韻題

其下以還之歲乙酉仲春西峯老生書

李兄汝詢遷葬挽三首

天資良玉與精金貌似其心自可欽不逐俗曹爭外  
物唯將真蹟寓清襟同堂會合如疇昔萬事蒼茫已  
古今孤露殘生猶未死薤歌窮谷獨悲吟  
生平荷愛若天倫少日情懷老夏真每恨微蹤長作  
蟄重陪歡晤竟無因依依幾愴樑疑月忽忽還驚劍  
會津一哭新原郡可得暮雲西望但悲辛  
我姊溫溫壽福全重牢當日簇曾玄從歸真宅嗟何  
憾人世空悲似逝川

右內喪挽



韓正叔 佑箕 挽

忽忽踰三月冥冥向九泉音容猶宛爾志業已茫然  
壙訣嗟何及蕭歌淚獨懸唯應餘慶在孺慕更堪憐  
南清河 啓夏 挽二首  
歸田暮景樂方餘乘化恩恩事可獻珠樹成叢蓮又  
早祇應遺慶在門閭  
六十光陰石火忙銅章阜蓋亦亾羊唯看定稿畱佳  
句名字將流百世長

金季章 斗文 挽四首

每言吾黨少君儔為學能誠不外求見識又高當遠

到那知今日便長休

嗟君志業已長捐美質難成自古然天道豈終無善  
報諸兒應有繼君賢  
千里相從似古人爾來二十有餘春當時刻苦心猶  
炯不忍庭除舊迹陳  
自痛支離近八旬眼看同志日凋淪幽明一酌悲無  
路泣寫哀章寄長君

次晦庵西江詞韻示舍弟二首

兄兮在家如寺弟兮在寺如家一身無伴更何嗟百  
事只合放下



日齋遺稿卷四  
氣憊漸倦對客神憊又艱作書不如謝絕且閒居一切無思無慮

偶吟三首

幽人獨卧念生涯耳有風雷眼有花寒月儘明人不賞一庭梅影漫橫斜  
中夜無眠八十翁祇今無力念蒼穹一前一却渾閑事唯願人人各盡忠  
世道滔滔似水流人知其弊莫知由機關費盡成何事覆轍相尋未肯休

宗會于淨寺

門戶有盛衰族屬有遠近幸有此會存相與講先訓  
族踈加惇睦門衰思振奮其道豈有他只可勉學問  
學問在日用事事求盡分敬恕最要切家邦無怨忿  
舜跖善利間尤當戒微隱富貴不足慕貧賤非所慍  
窮達乃爾命所患少令聞努力各自愛樹立光家運  
嗟余老垂死志業皆已償今日感懷多自訟成短韻  
舊城主安公重來就其胤子連山縣衙委訪窮

谷次韻以謝

陳榻昔季慙孺子習池當日美南州誰云暮境重逢  
面况有佳篇更洗眸情晤一場翻似夢舊遊回首幾



經秋却憐病螫無還往惆悵空山閉戶幽

復次

專城就養福優優騎鶴何須羨上州桐邑遺氓瞻白  
髮山中舊友拭青眸清詩此日留情話勝會他時記  
菊秋逝水浮生還一愴感君回首憶明幽

敬次 大報壇 御製韻

先王盛德固賢親 聖帝隆恩互萬春義奮尊攘遺  
志在壇崇報祀縟儀陳 宸章特揭昭如日感淚空  
流濕滿巾忍痛含冤死後已羣公可不一心遵

贈韓夏卿文卿二首

曩日長篇意自深諸君皆未會吾心閒中數載何增  
益好向前頭各檢尋

人生萬事總關天君子工夫只敬身半世所求今已  
得將何事業報 君親

龜巖金令公華鑑以季八十蒙 恩陞秩諸子

設宴獻壽衰病螫伏不得躬覩盛禮謹次權學  
士以鎮韻用伸瞻慶之忱 丙戌

春暉和暖百花生開敞宴高堂進壽杯天爵拜 恩三  
品貴親賓慕德四方來金章可待傳家得寶樹仍看  
滿眼栽却說山中騰異事人人親見老仙迴今公之先公亦



壽爵至同樞  
故篇內及之

又次安義城 重韻

忽忽新春半已除人心只是死灰如參尋病絕空相  
望書札慵拋却似踈庭草乍青微雨後山花欲放惠  
風初欽公高義能知仲可復籃輿問索居

金進士 聖甲 挽二首

高才逸韻早超倫故是英英席上珍三十蹉跎已可  
惜誰言一疾僂長淪  
芝蘭郁郁滿階庭爭道尊公福最丁血指慙懃救不  
得孝心應復泣冥冥

金景元 相甲 挽二首

草木欣欣盡向榮浮生一瞬不重明妻孥子幼都休  
說無限人間父母情  
眼中眉目尚森森去八重泉幾尺深窮谷茅齋讀書  
地可憐魂氣倘來尋

安公又來訪於齋庵歸而寄詩來要和步韻以  
謝之

三老逢迎會一場斜陽還惜下山忙敷腴已可誇心  
少八十何須歎鬢霜良晤未終怊悵久新篇繼至詠  
嘆長臨分握手依依處情義唯應死後忘



成參奉汝剛 至和挽

昔我梅邊靖惠公高齡到百位仍崇君能稟得形神  
肖眾謂當膺壽祿同白首微官纔草草黃粱一夢遽  
恩恩平生情義如兄弟北望坡原痛不窮

權玉汝 振挽二首

每謂君才不讓兄時來早晚見蜚英如何一疾拋長  
筭抱志平生竟未成  
清踈真幸好襟期半百生涯一可悲天道由來有伸  
屈英英幸有四男兒

金承旨子昂 斗明挽

負笈當時士友傾早季連桂振英聲微垣正議隆師  
義鶴髮恩光盡子誠季位在天差可憾毀譽關數豈  
堪驚如今一醉嗟無路蕭挽難窮後死情

李參判持叔 世載挽

元知器業自先公更有聲猷接晚翁銷鑰當年殊類  
憫廟廊今日眾望崇浮生消息真如夢滿眼功名忽  
墮空奕世交親情誼在不堪蕭挽遡悲風

次安義城來訪韻

喜鵲喃喃報曉晴晚來松下小輿輕欣然一笑成奇  
會未死何忘此日情



奉謝西村餉梨步來韻

磊落來從老友家  
蟠桃盧橘果誰加  
病喉解渴真為快  
多荷淡情不我遐

晦翁食梨詩以為盧橘不如而來詩則以為十倍蟠桃桃與橘之味未知果如何而其不能有加則可知矣本草謂梨為快果晦翁以為非浪得名云

次舍弟農窩五老詩韻寄呈諸兄案下

相從到老有三賢  
兄弟還慙數載先  
箴警固嘗聞古義  
頽慵其奈負餘年  
願言心上加工地  
常若天行不

息然朗月忽驚秋  
已半新篇孤詠却悵悵

衛武公季九十五猶箴警則人其可以老而

自廢耶既以自訟又以奉勉焉

伊川享壽最諸賢  
吾輩誰知此後先  
七十已逾將八十  
前季倏過又今季  
頭童齒豁何關也  
目暗耳聾亦自然  
所歎相思千里外  
無因簪盃寫幽悵

原韻

頃見明村兄抵我書中稱吾輩享季已多

明齋七十八吾兄七十五士威七十吾與

文玉六十九明齋士威文玉一生無疾病

得壽固宜而吾及兄長與病相伴以老亦



能至此誠可慰也噫明村之言誠然矣所  
恨各在遠地無由相會也茲作一律示諸  
友以求和

鯁生那敢仰羣賢師席曾蒙忝後先學業終慙違  
素志光陰忽覺到稀季神精已去嗟何及聾瞽由  
來便索然千里故人珍重意幾回披讀慰幽悃

士威龍村

摳衣函丈數三賢齒德由來或後先嗟我神精非  
少日羨君髭髮勝當季鵝湖講討今休矣廬嶽從  
遊已杳然警語牀前那易得每吟佳什暢幽悃

顯道明村

從遊四老盡時賢得壽居多較我先和氣滿容瞻  
盛德精華溢面賞高年工夫唯檢身心是學業無  
如強勉然自顧摧頽難用力日間嘯詠只消悃

文玉西村

曾編拙句寄諸賢自媿當時最著先暮境豈容無  
勝事窮途還幸各高年唱酬從古多傳者披玩將  
來更宛然首尾邵吟今復效却看堪笑有餘悃

前春顯道兄書中以吾儕享多年爲相賀  
弟作長律以謝且兼呈士威兄矣其後士



威和章送示舍兄見而次之顯道又次之  
文玉又次之遂成一帖蓋亦暮景勝事第  
自我始之不可不自我結之故復以一律  
續於下亦康節首尾吟之例也

子恕農窩

朴大叔挽五首

丁亥

聞君逝去至今悲一酌秋原遠莫追  
薤曲相將猶未及幽明孤負故人知  
真心至行自家庭絕俗離羣又妙齡  
晚節平和看學力誰言半百遽幽冥

君家兄弟志皆同更有阿咸與壽翁  
十載之間相繼逝德門無祿士林空

相從便以古人期末路常嗟友紀衰  
後死縱饒餘日在更於何處得箴規

憶昔青林歲暮時英才喜見二難隨  
聖門力學兄能任世路韜名弟自期  
克踐初心俱不媿奄摧中道劇堪悲  
祇今窮谷餘衰骨撫迹沉吟淚獨垂

戊子

避癘淨寺戊子三月也二首

昨年同卧地一半已成陳如何作後死  
日日獨傷神寥寥淨水寺終日共誰言  
獨卧南窓下看雲淚眼昏



崔善餘挽

與君初識面錦峽山泉齋一時同隊魚夙成君最佳  
委禽入吾門爭道坦腹郎乃家有遺慶謂必當立揚  
筮仕也能早奉檄慰三從交遊盡名勝涉世頗雍容  
飛語忽中人治長亦縲紲歸來海西曲坎壈度歲月  
公議久稱屈逡巡辭二邑酸寒一郵官又被餘波及  
榮辱與窮通莫不關吾命居然六十季霜髮已滿鏡  
世道更翻新京洛意已倦豈無知己者淹滯竟莫振  
幸有二男兒家聲庶不落春寒老猶健帶索猶可樂  
嗟余向來事朋知半見絕君雖若逶迤所存終如一

相逢兩歡謔每如年少時昨年舍弟喪慰書辭甚悲  
那知未及暮奄忽君又逝而我獨何為孑然尚在世  
聞君就窀穸末由往一酌平生遊好地萬事如逝水  
可憐石路傍孤墳經幾季劍會亦有時感舊一愴然  
淒涼薤露曲情在強悲吟君行尚未遠儻能知此心

悼傷獨吟三首

少時才氣出儕流將謂騰凌未肯休酒病居然成落  
魄可憐埋沒返山丘 右哀鄭浩汝潭  
如君雅正更誰儔植立從容遠眾咻有志未充嗟奄  
忽惜賢憐命淚盈眸 右哀尹一正明佐



可惜奇才命忽沉人琴俱絕劇傷心  
邇來季少多橫天每誦堯夫歲暮吟  
右哀尹元直明臣

李壽翁遷葬挽二首

幽明一別幾經季感舊懷賢每愴然  
旌娶過門攀不得祇今人事自堪憐

同志季來盡九京殘生賒死竟何成  
蕭章不盡心中事應有精靈識此情

次顯道韻二首

何嫌朝讀暮還忘書有忘時意不忘  
空對殘編看不得自憐回首已都忘

承示讀書盡忘猶能讀書忘而又讀又何患  
乎如我者已不能讀空負餘日矣三復來書  
為之嘆羨

蒼松野鶴一區閒安有紅塵到此間  
三復來書空悵望祇今無路一追攀

老病有何吟詠之興只就來語點綴成韻以  
寓蟄伏中懷想之意一粲如何

林大諫次韶

漢

挽二首

己丑

清名雅望擅南州自是真醇異俗流  
誰謂平生恬退志脩門一八俊長休



南來北去每相尋常感君侯惓惓心歸轉過門攀不  
得至今悲恨滿幽襟

宋子文遷葬挽三首

忽忽齒明四十霜懷賢一念豈曾忘如今啓窆移新  
兆引緋無由只自傷

志業中摧劇可悲謂言餘慶在三兒顛連天拯今如  
許天道茫茫竟問誰

三遷當日識深誠孤負平生託子情聞道新阡龍劍  
會不堪懷舊涕沾纓

右內壘挽

大拜後辭疏至十八蒙

恩許遞

庚寅

嗟吾遭遇未前聞自悼非才負 聖君四十七季官  
廿四秋今回首一浮雲

明村挽七首

浮生忽忽去如期吾弟先歸子又隨嗟我胡為尚畱  
滯孤懷日夕獨傷悲

老來剛健愈輝光乘化誰言似底忙豈但朋遊失所  
倚斯文不幸奈蒼蒼

纔承手札訃來隨如夢如虛數日疑所示一書嗟未  
復與人誠意更堪噫

書中每說欲來尋未死猶思一盞簪今日幽明便如



許此生何處更披襟

降師衛道一心純我趙重峯後一人終古重峯留一

語百季終信是非真

是非名實巧相蒙更有訛言儘鑿空太息平生一編

說祇應留與後人公

聞君去八九原墟筋力無由理素車情義如今長已

矣不堪西望涕盈裾

寄文玉

幽蘭在林下竟歲祇自知會有尋芳者奈此風雨時

謝文玉送蔥蓐及竹角二首

唐蔥春早最清新竹角抽來更絕倫又有水葵流匙

滑珍膏到此亦逡巡

四時新菜劇敷腴何歎盤中一肉無病口時時見波

及對之還復挹清癯

前日見惠圃中長物以為菊豢不如也信口

吟成不復依韻茲並書呈以資一笑

沈叔平內挽

嗟爾有淑質幼稱閨中秀血指救母病至性誠罕有

于歸得吉士兩美天所偶升堂尊章悅入室琴瑟友

熊熊屢叶夢獨樹枝葉茂良人更乘龍福履又何厚



天理諒難諶奇禍忽潛遘姑婦喪浹天慘仍先後  
芳季就重泉幽夜永無晝惻惻不忍言命矣何處咎  
伉儷義特重悼賢思不朽老人強拈筆悲吟不成句

姜叔九挽

漢世求賢重孝廉嗟公絕行獨能兼冰寒藥苦何曾  
比枕扇衣斑也不謙給耆人旬仁壽得緋銀三品  
聖恩霑新春一札仍成訣哭弟餘哀淚更添

族孫東奎挽二首

辛卯

旅遊攻業不知傷日夜庭闈望立揚萬事如今已無  
迹哀哀唯有一青孀

惜才哀命更何言與奪無端奈彼天妙質芳年埋地  
下可憐行路亦潸然

題慎汝謙

惟益

遊香山錄後二首

昔季遵海到金剛恨未因之躡妙香今日卧遊頗慰  
意喜君文字善開張

當時六日在山中猶恨淡幽未盡窮今見君遊纔二  
日閒行底事太恩恩

和李兼叔

益濟

次昔年唱酬韻二首

知君早識大方家世上窮通不足嗟所性自天初未  
損浮榮於我竟何加人生昨少今成老旭日朝升夕



已斜一息存時唯此事欲仁仁至豈云遐

大運悠悠水與流老來真覺此生浮  
枝山觀化星逾紀竹里亾琴歲  
四周殘骨獨畱都似夢悲懷常在  
不須秋看君更有憂時語長夜空  
添分外愁

兼叔來訪持示昔季與亾弟農窩唱酬詩數  
篇披玩手蹟不堪感愴兼叔遂要我追和噫  
以兼叔之家世淵源美質醇行而半生流落  
未免虛度光陰於喪病幽憂之中此農窩所  
爲嗟歎者也然其少日相期之意與夫晚景  
相勉之義所以惓惓於篇中者實出於相愛

之誠其心炯炯猶若可見吾輩今日亦有何  
別語志氣者不隨血氣而衰正當相與提撕  
警策求以毋負初心而已垂死殘喘則已無  
餘日矣如兼叔尚可以加勉也未知兼叔以  
爲如何下篇則只是寫吾後死之懷耳適有  
邊虞故末句及之

贈趙子良

漢輔

六載相逢五日畱來遲去速悵悠悠三冬讀業須加  
勉可惜光陰似水流

工夫須喫些辛苦不可優游因循也老人別



語無他幸勿忽也大學或問讀百遍後方有  
得力處

和士載以贐其行

士載吳公  
遂采初子

君詩出肝膈令我屢日吟君才故自超君志又可欽  
進學在讀書操存唯一心長趨指聖域何遠不可尋  
書中聖賢訓一一指南鍼晦翁戒兒帖勤謹味最淡  
聰明不可恃科臼易陸沉勿謂少壯時必惜分寸陰  
嗟余無所成枯落到如今每思未死前相聚資警箴  
唯是朝暮人能得幾盃簪願言自努力慰此垂死忱  
權郎弘道 示述懷之作走筆和之以贐其行

昨得士載詩今又得君吟諸君向學意可愛又可欽  
昨和士載詩略布勉學忱君當共觀之可以知我心  
聖訓盡要言何處別求尋若欲擇要言意味反不淡  
萬事在一誠為學方可諳讀書苟無誠能言豈離禽  
欲言不可盡有懷空滿襟冰雪空崢嶸天地正窮陰  
願君慎行李勿使疾病侵努力各自愛明春重盃簪

哀禹秀才

錫玉  
二首

志行清高出俗人襟懷開爽語言真如何一病同朝  
露司命無由問鬼神

芒鞋負笈弱冠纔始與成生夢錫來先後五季俱短



折老夫垂淚惜英才

鄭台叟

錄老

述懷有作頗有感慨之意次韻以

勉之仍以爲贖

去老益踰蟄足不出鄉縣相從既云稀篤志尤罕見  
喜君早有意中誠非外面獨於讀書事如絲未經練  
邇來似發憤蔚然期豹變自訟發吟詠消息異石電  
唯應更努力鳩毒戒安宴我欲助一言勿退當如戰

藥泉南相國

九萬

挽

西溪宿草幾回春公又飄然去返真雌甲殘生猶未  
死不堪長羨望蒼旻

次韻別李君敘

錄九

二首

壬辰

步來步去意飄然勤苦三冬誦聖賢縱使明季復來  
訪老入那得到明季  
諸君志氣各超然畢竟成功果孰賢老子此言須記  
取他時應憶舊辰季

秦仁宗姪道致挽三首

魯丘宗子一門良美質蹉跎祇可傷欲賦歸來竟未  
遂客中觀化又何忙  
短命方悲尚與奎君纔周甲亦奚爲浮生冉冉凋零  
去猶有衰翁淚兩垂



明齋遺稿 卷四  
人生一去更無歸山下新居似昔時萬事如今已陳  
迹松楸蕭瑟帶寒暉

送高恭叔可寅歸光山

遊子返故鄉復來未可知老人朝暮事明春亦難期  
耳聾不聞語握手但悵而節盃勉加餐願以慰相思

次天縱文山延諡宴韻二首

文山當日盛筵開爭覩天官捧 旨回豈獨哀榮稀  
往古當留簡策照方來孤懷自覺衝冠髮感淚那禁  
落酒杯欲說後人思報國可能隨處竭微才  
簪紳章甫簇華筵歌詠聯翩壓管絃死義臣心寧望

報褒忠 聖典特來宣一天共戴虛垂死強圉重回  
又幾季片片含冤忍痛志只應留與子孫傳

晚庵李相國遷葬挽二首

安危誰不憶忠賢觀化于今二十年垂死誤 愚方  
俟罪一哀無路哭新阡

滔滔世道到如今炯炯當年不黨心陋筆豈能摸盛  
德祇慙名姓托碑陰

題沈叔平遊金剛山錄

名山三八每逢秋仙分多君得最優輒有佳篇記勝  
賞朝來令我刮昏眸



韓文卿挽三首

癸巳

玉節纔從日下來丹旌却向故山回平生志業空埋  
沒為國嗟賢又惜才  
公私期望豈曾輕一夕翻如逝水傾固了死生元有  
數不能無恨老夫情  
相信由來有幾人世間非是久難真自然氣節能無  
懼末路何妨受眾嗔

草廬遷葬挽七首

久矣先生棄士林眼中儀範尚昭森今聞洞裏移真  
宅矯首難堪愴慕心

山環水抱好林泉舊迹回思已杳然一酌如今人事  
絕蕭章數疊不成篇

沙翁門下早傳心 聖世三朝際遇深誰料平生麗  
澤地暮年才戟忽相尋

慎齋平日最相孚有似伊川愛定夫此事後生知者  
少祇今吾道日睽孤

經濟遺規遡石潭萬言前後實相參後人欲識先生  
業不待他求此可撥

湖中昔日擬關闔五十季前事已陳絃誦寥寥變觸  
鬪傷心世道此何人



殘生孤露尚支離萬事如今異昔時獨抱苦懷誰與  
語尊靈儻識此心悲

聖汝挽三首

嗟君美質幼稱馴自是溫恭孝悌人况復平生少外  
慕俛躬為學一心真  
操心貞固絕虛浮外貌安恬更整修每謂學專兼必  
壽誰知一病奄長休  
彥暉去後擇夫隣前後唯君作主人好善有誠難復  
見悼傷非獨為天倫

李剛仲挽三首

才名少日邁諸兄弱冠登朝始亨偶爾青災無妄  
耳可嗟坎壈送平生  
底處幽居絕世塵超然高卧樂吾真暮季此計還虛  
擲重為吾君歎息頻  
悠悠氣化苦難均天道分明有屈伸莫恨身名枉埋  
沒胤賢文質已彬彬

李尚書整挽

清名雅望自從容故是明時善類宗白日照盆應未  
遠杳然何處覓仙蹤

族子顯教挽



天資寡默自淳然可惜無成奄九泉美質少季多天折實關門運奈何天

高恭叔挽二首

故是霽峯孫南州名進士雖云酒為跡嗜書老未已  
黑綬是何物浮生六十四無由佩一壺往餞秋山裏  
去歲南歸時重能未能知今春賁然來握手笑如期  
觀化又何遽已而長已而挽語病不成何以慰孝思  
示孫兒東源

日夜憂心守病翁三餘學業又成空始覺讀書真有

命阿孫須用慎齋功

少時聞慎齋之言讀書亦有命請其說以為吾自少欲讀○先

生疾革時作此詩以示又欲為小序口呼止此而氣短不能畢



明齋先生遺稿卷之四



